

EXERCITATIO IVRIDICA
DE
**ARTICVLIS
ELISIVIS,**

QVAM

PRAESIDE

IOHANN. HENRICO
BERGERO,

ICTO, POTENTISS. ELECTORIS SAXONIAE IN
SVMMO PROVOCATIONVM SENATV CONSILIARIO, COL-
LEGIORVMQVE IVRIDICORVM, QVAE VITEMBERGAE
SVNT, NEC NON IVDICII INFERIORIS LVSA-
TIAE ASSESSORE,

PRAECEPTORE AC STVDIORVM SVORVM PATRONO,
MVLTIS NOMINIBVS SVBMISSE DEVENERANDO,

AD D. XVI. IVL. clb Is c XCVI.

PVBLCO EXAMINI SVBMITTIT

IOHANNES HENRICVS EXSIVS,
CAVLA-LVSATVS.



THE UNIVERSITY OF CHICAGO



I. N. I.

I.

Quemadmodum Respublica sine iudiciis consistere plane nequit : ita etiam nullum subest dubium, quin omnino tempore iudiciorum ratio fuerit habita, quo inaequalitas inter cives corrigeretur, & unicuique iuris sui persecutio pateret. Depravato quippe genere humano, usus omnino exegit, ut lites, inter homines exsuscitatae, apud iudicem potius, quam privato stomacho & bile, transigerentur. Deus igitur ipse, supremus omnium iudex, post lapsum statim primorum parentum illis, qui, veluti in Reipublicae puppi sedentes, clavum tenent atque moderantur, suas in his terris vices, fascesque demandavit, donec die illo pantoeritico ad gubernaculum accessurus iudicis officio ipse fungeretur. Vt adeo iudicia inter Christianos non minus sint licita, quam summe quidem necessaria, Wissenbach. *Exerc. ad 1. 16. tb. 3.* Quorsum enim quis confugiat, si ius suum ab altero amice consequi nequit? Numne rem per vim absque iussu iudicis & propria autoritate rapere, vel debitum extorquere decet? Minime vero; sed si quis, spreto legum auxilio, in tantam furoris audaciam pervenerit, rem suam amittit, iureque suo plane pleneque excidit, *l. 13. ff. quod met. caus. l. 7. C. Unde vi.* Quid ergo? Sane nullum aliud remedium in foro proditum est, nisi quis illud per viam iuris publica obtineat autoritate, quod privatis desiderii indulgere noluit adversarii malicia. Dn. Stryk. *Introd. ad praxin forens. c. 1. §. 1.*

Iudicia sunt necessaria.

Deo constituta.

inter Christianos licita.

II.

Non tamen extemplo ad iudicium convolandum est partibus, haud raro de asini umbra, vel lana caprina, quasi pro aris & focis

Non statim est convolandum ad Processum.

ob nimios
sumptus.

certamen suscepissent; litigantibus. Quemadmodum Carpzovius *P. 1. C. 1. d. 9. n. 13.* refert, duos quondam opifices, de gallo gallinaceo disceptantes, multum temporis ac pecuniae consumpsisse, & de re hac minima, quam nec operae pretium est extra iudicium petiisse, vel tota plaustra actorum confecta fuisse. Multi enim propter lites ad summam deducti sunt egestatem, cum sine pecunia vix litigari queat; *l. 79. ff. de iudic. Carpzov. Proc. tit. 10. art. 1. num. 28.* Vnde non raro accidit, eos ipsos, qui victoriam tandem cum sumptuum quoque & expensarum adiudicatione reportarunt, tam longis anfractibus vexatos, totque sumptibus misere fatigatos sic affici, ut lugendum sibi potius esse putent, quod bonae alioquin litis aut instituendae aut suscipiendae consilium ab initio non abiecerint, quam gratulandum, quod tanto pretio nudam victoriae gloriam compararint: Sunt verba Anton. Fabri in suo consilio de reformanda iustitiae administratione, *Cod. lib. 9. tit. 22. def. 1.* quae excerpfit Carpzovius *P. 1. C. 1. d. 1. n. 1.* Conf. Brunemann, *prooem. Proc. Civil. Wehner. Observ. Pract. voce Iustitiae*. Wesen. Omnibus potius industriae nervis in id intendant altercantes, ut lis intra privatos parietes absque strepitu & figura iudicii amice componi possit; siquidem verecunda eorum cogitatio, qui lites execrantur, vituperanda non est, *l. 4. §. 1. de alienat. iud. mur. caus. fact.* sed lites execrantium laudabile dicitur votum, *c. 2. de V. S. in 6to.* Quod quidem licet ad gustum Causidicorum dictum non videatur: rei tamen & utilitati litigantium maxime est consentaneum, si rebus suis consultum, & marsupium haud emunctum velint, Carpzov. *Proc. tit. 10. art. 1. n. 13.* Neque enim re est, illud ancipiti fortunae arbitrio committi, quod per concordiam commode obtineri potest, ob tritum atque vulgatum illud: *Vtilius macre concordium pingui quavis sententia, Dn. Stryk. Introd. ad prax. forens. c. 2. §. 2.*

Sed amicitiae
compositio
sentanda a
partibus

III.

& a iudice.

Quod si iam tunc res ad iudicium est devoluta, iudex periculum faciat, omnemque moveat lapidem, quo pacto huic malo in tempore succurrat, nullamque non impendat operam, quo litigia

gia suis in principiis per amicabilem compositionem suffocare & extinguere liceat; quod ut ex voto animique sententia obtineat, exponat partibus molestias, ex processu oriundas, & sumptus litis, iacturam temporis, dissidia, animi rancorem & odia, inde provenientia, tum & dubium litis eventum, ac incogitatas, nec antea praevisas rerum vicissitudines, & quicquid deinde vel taedii vel adversi fuisse soleat, *Ord. Proc. Sax. Elect. tit. 1. §. besonders ibique Ziegler.* Sed nec partes, a iudice admonitae ad transigendum, se difficiles quam partes praebent, nec adversa fronte cornua opponant, quin potius dili- non respuant. genter expendant, quid vitii & mali ex litigio sibi imminet, curae, labores, vana spes, timor & centum alia, quae non aliter ac pillulas devorare necesse habent, *Carpzov. Process. tit. 10. art. 1. n. 29.* Quid? quod existimem, hoc unicum argumentum litigatorum ob Processus deterrere posse, quo minus facile & temere ad processum prolixitatem, profiliant ac prolabantur, modo sibi ob oculos ponant nimiam & sanguineis lachrymis deplorandam litium diuturnitatem prolixitatemque, quae non modo hominum plerumque, sed & vivaces cornicularum & cervorum aetates superant, Petr. Frider. *lib. 2. de mandato iudic. c. 13. sect. 15.* *Carpz. P. 1. C. 1. d. 1. n. 5.* Maxime autem illi, qui facies, virgas & trabeas ostentant, suadere tenentur concordiam partibus, coram Augustissimo Camerae Imperialis tribunali causas suas agitantibus, cum ibi lites fere sint immortales. Vnde decantatum illud proverbium: Lites Spirenses spirant, sed non exspirant, *Carpzov. P. 1. C. 1. d. 1. num. 3.* Quemadmodum etiam pleraeque lites non exspirabant prius, quam tandem Spira ipsa simul cum litibus exspiraret.

IV.

Cum vero litigantium ingenia sint nimis heteroclita, nec ullum amicabilis compositionis tentamen admittere velint, sed iudicis monitum respuant, & contendere malint, non possunt ad transigendum vel paciscendum compelli: Suaderi enim quidem potest concordia, non imperari, & pax est bonum persuasibile, non compulsibile, *Carpzov. Process. tit. 10. art. 1. num. 32.* Ideoque illis, ad procedendum paratis, via iuris a iudice intercludenda

Tum actor in-
structus sit
probatione,

quam iudex
indistincte illi
imponat,

Probatio dici-
tur navicula,
lapis angularis
iudicii,

da non est, sed processus aperiendus, ut illud, quod sibi deberi existiment, secundum solitum iudiciorum ordinem, ut dicitur *l. 4. C. de sentent. & interlocut.* persequi queant. Quo facto, non ultima, sed palmaria actoris cura sit probatio necesse est, qua solide instructus convincere possit adversarium. Illi enim, qui in iudicio aliquid dicit, asserit & intendit, onus probandi incumbit, *l. 2. ff. de probat.* Actor ergo, cum quid intendere soleat, etiam probare tenetur, *l. 21. ff. & l. 8. C. de probat.* Struv. *Synag. Iur. Civil. Exerc. 28. tit. 6.* Nisi forsan in possessione constitutus sit, vel praesumptio pro eo militet, quibus munitus ab onere probandi relevatur, idemque in adversarium transfert, *l. 12. ff. de probat. c. 18. X. de ressit. spol.* Carpzov. *Process. tit. 13. art. 1. num. 16.* Quam quidem probandi necessitatem imponit iudex actori, nullo personarum discrimine, nec alteri plus, alteri minus favere valet, quo malo vulgo iudices, inprimis *δυσόφαιοι*, laborare solent, quod tandem in proverbium abiit: Plus valet favor in iudice, quam lex in Codice. Id enim iustitia, quae hic observanda est, commutativa, eiusque proportio arithmetica, quae τὴν ἀξίαν personarum excludit, nullamque *προσωποληψίαν* attendit, iubet atque postulat, ut actor, quisquis etiam sit, illud, quod intendit, sub praecudio absolutionis solide probet. Vnde recte monet Heliod. *Lib. X. Aethiopis, p. 471. Edit. Bourdel.* τὰς ὑπεροχάς, inquit, & *δοσωμὴ τὸ δίκαιον, ἀλλ' εἰς ἐστὶν ὁ βασιλεύων ἐν ταῖς κρείττισιν, ὁ τοῖς ὑπολογίμοις κρατῶν.* h. e. *Fastigia dignitatis non recipit aequitas, sed is regnat in iudicio, qui probabilioribus vincit rationibus.* Probatio quippe dicitur navicula, quae ad portum deducit iudicem. Ruland, *de commiss. Part. 1. lib. 1. tit. 1. num. 1. lit. d.* Imo est lapis angularis iudicii, totaque causae victoria consistit in probatione. Bald. *in l. 19. C. de test.* qua deficiente, actor sub iustae etiam causae clypeo succumbere potest, & saepenumero in disceptationibus forensibus contingit, ut actori non ius deficiat, sed probatio, *l. 30. ff. de test. et tel.* Vulgatum enim iuris axioma est, quod in omnium fere ore versatur, & a reis ubique circumfertur: Actore non probante, reus absolvitur. Quod adeo quidem verum est, ut, sicubi actor in

pro-

probatione succumbat, reus non ab instantia solum, sed ab ipsa etiam instituta actione definitive absolvatur, etiamsi nihil praestiterit, nihil probaverit, l. 4. C. de edend. ibique Iason & Salicet. l. 9. C. de oblig. & act. Bachov. ad Treutl. Vol. 2, Diss. 4. th. 8. lit. C. & D. Carpzov. Process. tit. 13. art. 1. n. 4.

V.

Cum itaque probatio sit anima processus & victoria causae a & anima probationibus dependeat, atque expectanda inde sit; omnis operatio est impendenda, ut probationes congrue instituantur, Ziegler. *Introd. ad Process. For. Sax. c. 10. §. 2.* Nequaquam vero existimet probationem suscepturus, confuse eam esse expediendam, testesque, sicubi per eos probare satagat, productos tumultuarie esse examinandos; sed actus examinis secundum formam, iure praescriptam, instituitur, necesse est, ita, ut negotium, super quo probatio est suscepta, certis includatur articulis. Carpzov. *Process. tit. 13. art. 4. n. 1.* Siquidem commodior faciliorque eruendae eliciendaeque veritatis via atque ratio prodita hactenus non est, nisi illud, quod probandum, in articulos redigatur. Articuli enim loco probationum succedunt. Speculat. *in tit. de poss. §. 3. num. 3.* ac ad eos, tanquam ad lapidem Lydium, referenda sunt omnia, cum actus, extra articulum gestus, firmitate sua destituatur. Ruland. *de Commiss. P. 3. lib. 1. c. 1. num. 5.* Hinc dicitur: testem deponentem extra articulum nihil plane probare, c. 29. ibique Mynsing. *num. 10. & Dd. X. de test.* Ruland. *c. 1. n. 6.* Vmm. *Process. Diss. 13. th. 13. n. 64.*

VI.

Illud hoc loco non est sicco pede praetereundum, necessitatem articulandi de excellentiori probationis specie, atque adeo de sola probatione ordinaria, quae vocabulo *Beweis* absolute posito significatur, esse intelligendam. Neque enim eadem forma in nuda demonstratione, quam voce *Bescheinigung* oder *Benbringung* connotare assolent, desideratur, sed omnino liberum est integrumque actori, utrum demonstrationem certis includere articulis, an vero eandem citra articulorum ritum iudici offerre

includenda articulis,

Demonstratio summaria non opus habet articulis,

Sed articuli
cante omittuntur.

Licet restricta
sit ad certum
terminum.

Contra- demon-
stratio ad
terminum de-
monstrationi
dictum non
est adstricta.

Rat. dilationi
convenit
probatio &
demonstratio.

Vocabulum
Barthun in-
telligendum
est de ordina-
ria probatio-
ne.

ferre velit; quandoquidem formatio articulorum Ord. Process.
tit. 24. pr. ad processum ordinarium restricta legitur. Quini-
mo actor insigni sibi consulat cautela, si in processu summario,
maxime sicubi per testes suam demonstrationem fundare sara-
gat, formatione articulorum plane pleneque supersedeat, & sal-
tem testes summariter examinari curet; quo ipso omnem omnino
occasionem exhibendi interrogatoria, quippe quae non, nisi de-
monstratione in articulos redacta, sibi locum vindicant, reo prae-
cidere potest. Neque aliud obtinere putem, tametsi, quod qui-
dem plerumque fieri solet, demonstratio per sententiam certo
circumscripta sit termino. Ex eo enim, quod demonstratio in
hoc processus articulo probationi ordinariae equiparata est, non
statim concluditur: in reliquis omnibus illam eodem iure cum
eiusmodi probatione censeri debere. Non quidem inficias ive-
rim, tum demonstrationem istam intra terminum Saxonicum iu-
dici esse exhibendam; nihilominus tamen nego, illam praecise
articulis esse instruendam, cum in hoc quidem capite naturae
demonstrationis per restrictionem ad certum terminum nihil de-
tractum intelligatur, quippe quae ne quidem id efficit, ut reus in-
tra terminum demonstrationi accommodatum suam etiam con-
tra-demonstrationem, die *Gegenbescheinigung* / quam vocant, nisi
illa eodem termino per sententiam circumscripta fuerit, offerre
teneatur, cum sane eidem quocunque temporis articulo hoc ipsum
liceat, quamvis alioqui maxime circa passum probationis partes
actoris & rei pares aequalesque esse soleant. Alia ratio est, quod
attinet ad dilationis solennia, quae aequae in demonstratione nu-
da, ac in probatione ordinaria, valere concesserim, hac quidem
ratione suffultus, quod argumentum dilationis necessariam habet
relationem ad ipsum terminum, sententia vel expresse vel tacite
comprehensum. Sed quorsum, quaeso, referemus vocabulum:
Barthun / absolute positum, quo interdum in sententiis, non ad-
iecto verbo: *erweisen* / Ictos praesertim extraneos uti solere anim-
advertimus? Illud vero vocabulum non de nuda saltem demon-
stratione aliqua, sed de ordinaria & solenni, quae in dubio iniun-

cta

Et praesumitur, probatione explicandum est, ut adeo terminus
 probatorius praecise observari debeat, nisi quis facultate proban-
 di cadere velit, prout se obtinuisse coram Regim. Hallens. in causa
 H. G. aufm Windel contra R. H. E. von Eröthen Wittbe / con-
 sentientibus postmodum Iuris lenensibus & Helmstädiensibus, te-
 statur Dn. Unversärth de Paedia Iurisprud. c. 6. n. 98. Quae deinceps
 sententia, non obscuro fontis indicio, Administratori Archiepis-
 copatus olim Magdeburgici, Augusto, placuit, ab eoque
 peculiari Decisione in *Iustiz-Causen und Process. Eachen de anno*
1678. §. 4. confirmata est verbis: Weil auch wegen des Worts:
Darthun, so in Urtheilen und Abschieden bißweilen allein pfl eget ge-
 brauchet zu werden / wie auch nicht weniger über dem Wort: beybrin-
 gen / viel Streit in den Verichten entstanden / ob dadurch ein ordent-
 licher Beweis / oder nur eine Demonstration oder Bescheinigung zu
 verstehen; So wird hiermit decidiret / daß im Fall einem per sen-
 tentiam, oder decretum etwas **darzuthun** auferleget würde / hiers-
 durch ein ordentlicher oder förmlicher Beweis: durch das Beybrin-
 gen aber so wohl in ordentlichen als summarischen Processen nur ei-
 ne Demonstration und Bescheinigung verstanden werden soll / welche
 ad terminum probatorium Saxonicum nicht adstringiret ist.

VII.

Duo autem in fronte Dissertationis vocabula, quae ex lege
 methodi sigillatim evolvenda sunt, nobis occurrunt: *articuli* al-
 terum, alterum *elisivum*. Verbum articuli nonnullis derivatur
 ἀπό τῆς ἀρθου, quod iuncturam sive articulum, Germanice Gelen-
 ste / significat, Ruland, *de Commiss. Part. 3. lib. 1. c. 2. n. 8.* Alii vero Articuli Ety-
mologia.
 deducunt ab artu, i. e. membro. Baldus in *cap. Accusatus de baere*
etc. in 6. Artus autem, inquit Sipontinus, partes sunt corporis inter
 iuncturas connexae, dictae, quod inter se arctentur, unde minores
 partes per diminutionem articulos vocamus, quales sunt digitorum.
 Confer. Blum. *Proc. Cam. tit. 68. n. 5.* Calvin. *Lex Iurisd. voce articu-*
lus. Vera harum quidem derivationum magis arriserit, eam si ele-
 geris, minus peccabis, cum tota tandem res eo redeat, quod utra-
 que analogiam ab humani corporis habitu, & recte quidem, pe-

tat. Quemadmodum enim in corpore humano membra per articulos iunguntur: ita per articulos fit iunctura seu contextatio orationum, sive textura quaedam ex his, quae in libello continentur, cum illis, quae in articulis ponuntur. Sicuti ergo articuli in humano corpore, quo magis vitiis naturalibus vacant, tanto maiorem laudem merentur; contra vero quando superflui, aut non recte dispositi, vituperio subiiciuntur: ita quoque articuli, in causis, quanto concinnius breviusque conficiuntur, tanto maiorem firmitatem auctoritatemque consequuntur, quippe cum superflui & abundantes a iudice reiiciantur. Namque quod Medicis usu venit, ut superflua, nociva & putrida membra resecant; idem quoque iudices observare debent, ut irrelevantes ac impertinentes articulos amputent. Amplius ut vitium est, si nervi seu articuli sint contracti: ita in articulis pro vitio reputatur, si non recte quotentur & ditumerentur. Ruland, *de Commiss. Part. 3. lib. 1. c. 2. n. 9. & 10.*

VIII.

Vocabulum vero articuli diversimode usurpatur, atque ad **Homonymia**, varia transfertur. Modo enim denotat nodum; Vnde Columella *de re rustica lib. 2. c. 12. Antequam seges in articulum eat, i. e. nodum mittat, & ex herba in culmum assurgat*: Ita sarmentorum articulos dixit Cicero. In rationibus articulos appellari, quos Graeci *ἁόγια*, i. e. titulos vocant, quibus causa expensae pecuniae breviter perscribitur, Casaubonus *ad Suetonii Caesarem c. 47.* observat. Deinde non duntaxat pro particula, i. e. praepositione coniunctioneve, sed & pro quolibet verbo ponitur. Sic verbum *est* vocatur articulus, *l. 34. §. 1. ff. de aur. & arg. leg. & quisque l. 29. ff. de hered. instit. & tum l. 4. ff. de condit. & demonstrat.* Qui etiam pro clausula & oratione sumitur, *l. 27. §. 2. ff. ad Sc. Trebell.* ibique Prat. & Brissou. Porro articulus idem est, ac interlocutio vel sententia interlocutoria, *l. 5. C. quorum appell. non recip.* ibique Gothofred. Accursius autem *ad d. l. 5. articulum* interpretatur sententiam definitivam, cuius etiam interpretationem probat Albert. Quamvis mihi quidem opinio Calvinii *Lexic. Iurid. sub voc. articulus*, magis arrideat, quippe qui existimat, articulum

culum illic pro capite & membro sententiae sumi, cum ab uno sententiae capite & membro appellari queat, *l. 13. ff. de appell. Guid. Pap. Dec. 436. qu. 66.* Amplius usurpatur pro themate, factique specie proposita, (casum vulgo appellant,) *l. 12. ff. de LL.* Vt-terius articulus in Arcadii & Honorii constitutione *l. ult. C. de offic. comit. sac. palat.* idem significat, ac statim, confestim, *in d. r. o. u. u.* seu in ipso temporis momento, ut recte ibidem interpretatur Accursius. Et hoc etiam sensu accipitur apud Terentium *in adelph. act. 2. scen. 2. vers. 20. vide, ut in ipso articulo compressis eam.* Parili modo adhibetur apud Ciceronem *in Quint.* ut cum suis conditionibus ipso articulo temporis adstringeret. Denique non raro capitur pro eo, quod vulgo dicimus punctum, vel potius pro particula & membro periodi, totius alicuius propositi, *l. 22. §. 12. ff. solut. matrim. l. 5. §. 1. ff. de praescript. verb. l. 9. ff. de stat. Hom. l. 6. §. 1. C. de bon. quae lib.* Quo sensu etiam hanc vocem accipiunt Pragmatici, cum ea, quae probanda veniunt, in certos digerunt articulos. Atque ita accipitur *in c. 2. §. testes. de testibus & attest. in 6. c. 38. X. eod.* Quam significationis Definitio. rationem in praesens nostram quoque facimus, quandoquidem articulus nobis appellatur quasi membrum alicujus facti seu casus minutissimum, videlicet cum singulae orationis sententiae intervallis quibusdam distinguuntur. Blum. *Proc. Cam. tit. 68. n. 5.* Ol-dendorp. *de form. libelli Rubric. de posit. & artic. vers. articulus vero appellatur.* Vel brevius: Articulus est pars intentionis, quam liti-gans probare vult. Ruland. *de Commiss. Part. 3. lib. 1. c. 2. n. 12.* Vmmius *Proc. Disput. 13. thes. 13.*

IX.

Ad Articulorum originem quod attinet, sciendum, eam iu-ri Civili minime esse adscribendam, quippe cui illorum usus in-cognitus fuit, sed eum per Glossam demum atque Dd. esse intro-ductum, Ruland. *de Commiss. Part. 3. lib. 1. c. 2. num. 3.* & mori-bus primum in omnibus fere iudiciis, curiarum stylo, receptum, postmodum iure Canonico confirmatum, *c. 2. §. testes de testib. & attest. in 6. c. 38. X. eod. Clem. saepe de V. S.* ac denique iure Came-rali approbatum, *Ord. Cameral. Part. 3. tit. 15.* adeo quidem, ut

omnia olim scripta ; quocunque etiam nomine appellarentur, aut exhiberentur, articulatim producenda essent, & non solum actor suam intentionem, sed etiam reus suam defensionem per articulos proponere teneretur, Blum, *Proc. Cam. tit. 68. num. 6. §. tit. 63. num. 20.* Vnde variae articulorum species atque divisiones

Articuli positionales.

natae sunt. Actor enim suam actionem iubetur intentare per articulos *positionales*. Hos aliquando simpliciter articulos, nonnumquam vero positiones appellari, monet idem Blumius *Proc. Camer. tit. 68. num. 13.* Nec sane negandum est, positionem cum articulo a Doctoribus passim confundi, Positionis tamen verbum generale est, quod tanquam genus analogicum dividitur in positionem in specie sic dictam & articulum. Amplius *Clementina saepe de V. & S.* positiones articulis opponuntur. Vmm, *Proc. Disput. 13. tb. 1.*

Differunt positiones & articuli (1) fine.

num. 3. Strauch. *Dissert. ad π. 25. tb. 5.* Differunt vero (1) *fine*. Ponens intendit probare per confessionem adversarii, & ita positiones propter veritatem ab adversario eliciendam conscribuntur; Articulans vero per testes vel instrumenta probationem suscipit, atque adeo articuli propter ipsam probationem, testibus instrumentisve faciendam, conficiuntur. (2) *ordine*. Positiones praecedunt, & quicquid reus ad illas respondens inficiatur, de eo postmodum formantur articuli. (3) *effectu*. Ponens omnia, quae posuit, confiteri praesumitur, *l. 9. C. de liberal. caus.* & sic positiones contra ipsum probant; non etiam articulans, *c. ult. de iureiurand. in 6.* quippe articuli contra articulantem probare non cen-

Notatur Brunnemann.

sentur, quicquid etiam senserit Brunnemannus *Proceff. Civil. c. 17. num. 2.* ubi se illud non capere ait, sed articulantem omnino aliquid asserere contendit. Verum enim vero ponens vult, ut adversarius respondeat, quo per eius confessionem releveretur ab onere probandi; Igitur aequum est, ut ipse quoque ponens ponendo confiteatur, atque adeo relever adversarium ab onere probandi, ne iudicium claudicat. Contra vero articulans non vult, ut adversarius respondeat, nec eo fine suos producit articulos, sed ut negata tantum per testes vel instrumenta prober. Non ergo articuli magis, quam interrogatoria, vid. Gomez, 3. *Resol. 12.*

num. 4. Vmm. Disp. 16. tb. 10. num. 67. in fin. statim confessionem articulantis inducunt, Hiltrop. *Process. Part. 3. tb. 5. num. 43.* Atque eandem quidem sententiam tuentur Gail. 1. *obs. 79. n. 6. 7.* Bocer. *Cl. 6. Disp. 22. tb. 13.* Carpzov. *Proc. tit. 13. art. 4. n. 6.* Vnde & si reprobans forniet articulos, ac pro confirmatione petat articulorum probatorialium recognitionem, ea abiudicatur, quemadmodum docuit Dn. Svendendörfferus *Process. Fibig. p. 1402. seqq. daß Kläger die zu recognosciren nicht schuldig.* (4) *forma.* Articuli semper, nisi loco ac tempore coarctati vel praegnantibus fuerint, affirmative sunt concipiendi. Positiones vero etiam negative formari possunt, c. 1. *de confess. in 6.* (5) *tempore* volunt differre, cum etiam publicatis attestatis positiones, non item articuli; proponi possint; de quo tamen nec immerito fortassis Brunnemannus c. 1. dubitat, nisi quis instrumentis probare vellet. conf. Scacc. *lib. 1. de iudic. c. 60. num. 5. & lib. 2. c. 7. qu. 10. num. 450.* Gail. *lib. 1. Obs. 79.* Vmm. *Proc. Disp. 13. tb. 1. num. 3.* Carpzovius *Proc. tit. 13. art. 4. num. 4.*

X.

Quamquam vero Gailius *cit. Obs. num. 3.* docet, differentiam positionum & articulorum in praxi, maxime Camerae, tam accurate non observari; proprie tamen & κατ' ἐξοχήν hic sunt positiones, quas actor in suo articulado libello, ad veritatem a reo, mediante categorica responsione, eliciendam proponit. Has si reus, vel omnes, vel quasdam, negaverit, actor tenetur formare articulos *probatoriales*, quos, ex istis positionalibus articulis, a reo per responsionem negatis, extractos ad probandum per documenta vel testes producit. Sin vero reus excipiat, tum suam exceptionem per articulos proponat, qui generatim vocantur articuli *exceptionales*, sive exceptio sit peremptoria sive dilatoria. Speciatim autem *defensionales* articuli vocari solent, quibus reus suam defensionem per exceptiones peremptorias, merita causae principalis concernentes, articulatim proponit. Quamvis enim verbum *defensionis* nonnunquam pro qualibet exceptione, dilatoria aequae ac peremptoria, sumatur, l. 56. ff. *de condict. indebit.*

Praxis Camerae.

Articuli probatoriales.

exceptionales, defensionales.

l. 4. § 11. C. de except. in praxi tamen articulos defensionales dilatoriis exceptionibus semper opponi, testatur Blumius *Process. Camer. tit. 68. num. 15.* Doctores quidem accuratiores adhuc aliquod discrimen inter articulos defensionales & peremptorios constituunt: Defensionales enim esse asserunt, quando reus ad sui defensionem allegat, actori nullam comperere actionem, vel eandem iam ipso iure esse sublatam, atque adeo suas exceptiones, quas vulgo intentionis seu facti appellare solemus, articulatim proponit. **peremptorios.** *Peremptorios* vero articulos esse volunt, quibus exceptiones, quas iuris nuncupamus, proponuntur, quae quidem actionem propositam non iam tum ipso iure esse sublatam, arguunt, sed demum ope exceptionis elidunt. *Blum. c. 1. num. 6.* Hinc illas etiam exceptiones, qui actionem proprie non perimunt, sed verius elidunt, congruentius *elisorias* vocari arbitratur. Speculator *Rubric. de exception. §. 1. num. 1.* Quam eandem ob causam practici **elisi.** articulos *peremptorios* saepe *elivos* indignant, nec raro defensionales, *peremptorios* & *elivos* pro synonymis habent, ac pro iisdem sumunt. Quodsi reus, his *elivis* semel exhibitis, alios **super-elivi.** postea adiungat articulos, vocantur *super-elivi* seu additionales *elivorum* - articuli. Liberum etiam atque integrum actori aequae ac reo, est, sicubi priores forte articulos obscurius conceptos existiment, illis adiacere alios, qui dicuntur **declaratoria-**
les. *declaratorii*, *declarativi*) quibus articuli antea propositi melius & clarius explicantur, quos aliquando, abusive tamen, **additionales.** *additionales* vocant. *Additionales* enim proprie sunt, qui prioribus, cuiusque sint generis, noviter adduntur. Quibus si adhuc alii **superaddition-**
ales. articuli *superadduntur*, *superadditionales*, item *additionales* *additionum* appellantur. Denique proditi etiam sunt articuli **causales.** *causales*, quibus causae a reo in processibus mandatorum cum clausula, & pignorationis articulatim proponuntur & allegantur, quare iis parere non teneatur, vel quare pignoraverit. Qui illis **replicatorii.** *causalibus* ab actore opponuntur, modo *replicatorii*, modo *elivi*, modo *defensionales* vocari solent. *Conf. Blum. Proc. Camer. tit. 68. n. 13. usque ad n. 20.*

XI.

Cum vero partes, earundemque Advocati, malitiosa litigandi, litesque protrahendi, libidine imbuti, articulandi modo nimium abuterentur: illum ob perniciosam processus prolixitatem, quam recenset late Blunius *Proc. Cam. tit. 68. n. 7.* non amplius ferendum, sed in suo territorio abrogandum esse primum Serenissimus Elector Saxoniae, Augustus, censuit *Part. 1. Const. 2.* Quem quidem morem deinceps in Comitibus anno 1654. Imperii Ordines comprobarunt *Recess. Imper. noviss. de anno 1654. §. diesem nachst 34. §. Es sollen auch 37. §. zu Beförderung 64. & §. zu dermahliger 96.* Quo loco obiter observandum, laudatum modo Imperii Recessum multa ex Processu Saxōnico Electorali, tanquam accuratissimo, esse mutuatum. Libellus itaque articulatus a Saxonia & Camera exulat, adeo quidem, ut ceu ineptus ex officio reiiciatur, dentibusque dilaceretur. Carpv. *P. I. C. I. d. 2. n. 1.* Quo facto soli hodie articuli probatoriales, reliquis explosis planeque abolitis, in Saxonia & Camera frequentantur, Carpv. *Proc. tit. 13. art. 4. n. 7.* Blum. *Proc. Cam. tit. 63. num. 5.* quos actor, reusve, ad probandum per testes vel documenta producit. Actori quidem si onus probandi incumbit, ille vel suae actionis intentionem, a qui ratione reo negatam, probare satagit, certosque format articulos, qui probatoriales vel probatorii speciatim salutantur, vel ad exceptiones rei, omissa negatione, replicat, ad suamque replicam fundandam & probandam articulos conficit, quos Practici vocant *elisivos*. Et sic, ordine iubente, ad alterum tandem dissertationis nostrae membrum provehimur.

In Camera & Saxonia abrogatus est usus articulorum.

Exceptis tamen articulis probatorialibus.

actoris dividuntur in probatorias in specie

& elisivos.

XII.

Vocabulum *Elisivi* descendere existimo ἀπό τῆς elidere, quod, auctoritate Maronis, idem est, ac perimere, enecare, stringendo premendoque praefocare, cum *lib. 8. Aeneid.* inquit:

Elisivi Etymologia,

ut prima novercae

Monstra manu geminosque premens eliserit angues.

Et Suetonius in *Caesare* c. 39. *Saepe, inquit, prae turba elisi & exanimati sunt.* Idem in *Tiberio* c. 39. *Incaenante eo, plura & ingentia*

*etia saxa fortuito superne delapsa sunt, multisque convivarum & ministrorum elisis, prater spem evasis. Amplius iure Canon. probationes elids, i.e. tolli dicuntur, c. 5. §. si autem X. si lue non contestat. Iure vero Civili id elidere modo significat: agentem, accusantemve, mediante exceptione, repellere, l. 2. §. 5. ff. de dol. mal. & met. except. l. 4. C. de Ord. Cogn. l. 17. ff. de evict. modo idem est, ac excipientem replicatione summovere, l. 27. §. 2. ff. de pact. l. 21. §. 1. ff. de pign. Quam ultimam etiam significationem inprae-sens nostram facimus. Actor enim exceptiones rei enervat atque elidit, mediante replica, ad quam fundandam formare tenetur articulos, quos in praxi vocamus *elisivos*, qui tamen omnino distinguendi sunt ab iis *elisivis*, quos reus ad exceptionem suam peremptorialem probandam conficit, actorique opponit, quorum mentionem iniecimus §. 10. Non immerito forte etiam eos nuncupare possis articulos *replicatorios* eo, quod per eos replicatur & resolvitur ius excipientis, arg. §. 1. Inst. de Replicat. l. 2. §. 1. & 2. ff. de except. Theophilus reddit: ἀναλύει ἡ τῆς παραγχα-Φῆς ἰσχύς. Vis exceptionis resolvitur. Rhetores firmamentum appellant. Nam, definitore Cicerone in partit. Firmamentum est, quod ad labefactandam rationem (ea nostris est exceptio) refertur. Vinn. ad pr. Inst. de replicat.*

XIII.

Descriptio ar-
ticulorum eli-
sivorum.

Quibus praenissis, haud difficile fuerit, aliquam articulo-
rum *elisivorum* descriptionem, qualis quidem pro natura ac indole
argumenti composui dari potest, intelligere, nempe quod sint
articuli, quibus actor replicam, ad impugnandam exceptionem a
reo oppositam, articulatim concipit ac format. Quamquam haec
ipsa descriptio saltem petita est ab eo, quod fit plerumque. Alio-
quin etiam articulos *elivos* formari a reo ad convellendam repli-
cam, atque adeo eisdem duplicam, & sic deinceps, inferi posse,
ambigendum non est. Quemadmodum enim actor replicando,
atque sic contra exceptionem, rei instar habetur: ita amplius reus,
duplicando adversus actoris replicam, locum suum, quem excipien-
do paulo ante mutaverat nonnihil, recipit atque tuetur. Enim-
vero

vero integrum, qui sua etiam laude non destituitur, tractatum *de* <sup>De quibus silet
Cala.</sup> modo articulandi Marcellus Cala conscripsit, quem vetustate fere exoletum non ita pridem Dn. Praeses a blattis vindicavit, eumque prelo denuo subiectum e tenebris in lucem, e situ & squalore in solem, nova praefatione addita, reproduxit. Mirari tamen merito subit, Virum Clarissimum, qui modum articulandi ex professo pertractandum perlustrandumque suscepit, de nostro argumento alte silere, adeo, ut in integro libello ne apex quidem de articulis elisivis extet. Vnde & non iniuria conqueritur Rulandus *de Commiss.* Part. 3, lib. 1, c. 3, num. 1, neminem ex asse modum conficiendi articulos tradidisse, in primis autem carpit atque reprehendit Calam, illum, inquit, quidem in titulo libelli hanc artem crepasse, eamque profectum fuisse, magis tamen, quomodo id, quod articulatam est, probetur, quam qua ratione articulandum sit, docuisse,

XIV.

Quamvis autem Rulandus existimet, se docto & satis amplo ^{Rulandus} tractatu, quem *de Commissariis* composuit, hanc articulandi artem ad amussim explicasse, & exacte demonstratam dedisse: idem tamen voluntati atque expectationi nostrae non satis responderet, sed articulos elisivos alto transmittit silentio. Ast quid de Carpzovio, ^{Carpzovius} Ictorum Saxoniorum Principe, dicemus? Non piguit ejus monumenta a capite usque ad calcem excutere; neque tamen quicquam in iisdem, quod meo inserviret instituto, investigare licuit. Atqui autem argumentum est scitu necessarium, & quotidiana se vindicat utilitate, ut omnino operae pretium fuerit, eidem, quo par est, studio incumbere. Neque vero Advocatum sagacitatem suam magis probare posse putem, quam si argute replicam, ad elidendam exceptionem a reo oppositam, articulis probatoriis concludat, atque adeo articulis elisivis concipiendis artificium suum exerat. Cum au- <sup>Excusatio au-
toris.</sup> tem me in praefens subsidia, quae aliis ex scriptoribus in promptu esse solent, fere destituant, nec ego etiam hactenus in foro, ipsisq; rerum argumentis, versatus fuerim, veniam facile me impetraturum confido, si nonnulla saltem, quae quidem maximam partem ex Dn. Praefidis ore, quod ingenue fateor, observavi, hoc loco, quo fieri potest

ordine, sub incudem revocavero, ulterioremque utilissimi argumenti tractationem alii tempori reservavero. Sicubi vero forsan mihi vocabulis minus latinis, quibus tanquam terminis technicis supersedere non licebat, uti contigerit, aequos rerum aestimatores, ne in sinistram interpretentur partem, nec mihi vitio vertant, obsecro, cum summorum virorum autoritate suffulciar, neque etiam, nisi iisdem adhibitis, mea animi sensa commode satis exprimere possem.

XV.

*Ars articulan-
di maxima
est.*

Articulandi artem summum inter Causidicos tenere gradum, & antiquis committendam esse Advocatis, expertisque Procuratoribus deferendam, recte monent Rulandus *de Commiss. Part. 3. lib. 1. c. 2. n. 1. & 2. Vmmius Proc. Disp. 13. tb. 13. n. 64.* ut merito apud Italos vulgo dici soleat: *Negli articoli, sono si pericoli*, i. e. in articulis sunt pericula, ut refert Vrsill. *Super septem. Decis. Affict.* Advocatum ergo circa confectionem articulorum, ut concinne formentur cauteque concipiantur, sollicitum esse ac diligentem oportet. Quodcunque vero generatim de articulis ratione conceptionis dicitur, idem fere omne in nostra quoque articulorum specie

articuli sunt

(1) affirmativi.

repeti posse existimo. Omnes autem articuli, atque adeo etiam elisi, (1) *affirmative* & per verbum *ſich*, Germanice *Wahr* / concipiendi, *Recess. Imper. de anno 1654. §. zu welchen Ende. 49. vers. durch das Wort: Wahr.* Brunneman. *Proc. Civil. c. 17. num. 19.* (2)

(2) quotati.

debent *quotari* & dinumerari, alioqui pro inepris habentur, & rejiciuntur. Ruland. *de Commiss. Part. 3. lib. 1. c. 2. n. 9. in fin.* (3) Pars

(3) succinctori,

articulans sollicitè curet, ut *succinctos*, breves & momenta necessaria continentes articulos conficiat, *dict. Recess. Imp. de ann. 1654. §. zu welchen Ende 49. vers. etliche kurze probatorial articul. Ord. Proc. Sax. tit. 10. §. 7 vers. daß sie sein rund.* Ruland. *c. l. c. 3. n. 3. Carpz. Proc. tit. 13. art. 4. n. 8. & 9.* Caveat itaque, ne multiplicet suos articulos: Nam, ut loquar verbis Oldendorpii *tit. de posit.* nunquam tutum est in his, quae sigillatim probanda sunt, uno atque eodem orationis contextu multa copulatim proferre, altera enim parte non probata, totus corrumpitur articulus, *l. 13. §. 3. ff. reb. dub. caus. 3. qu. 9. can. 17.*

conf.

conf, Ruland. *P. 3. lib. 1. c. 3. n. 3. & 4.* Quod tamen ego quidem,
 nisi egregie fallor, restringendum putem ad articulum, qui homo-
 genea continet; Contra vero ad articulum heterogenea comple-
 ctentem quod attinet, affirmare potius ausim, eundem constituere
 exemplum regulæ: *Vtile per inutile non vitiatur* l. 1. §. 5. ff. de *V. O.*
 Caveat porro articulans, ne verbis nimium obscuris concipiat arti-
 culos, urpote qui a iudice æque, ac ab adversario, repudiantur,
 exemplo l. *Domitius* 27. ff. *qui testam. fac. ubi aut*, inquit Celsus, *non*
intelligo, quid sit, de quo me consulueris, aut valde stulta est tua con-
sultatio. (4) Articuli sint certi & concludentes, ac fundent intentio- (4) certi,
 nem articulantis, *Ord. Proc. Sax. tit. 20. §. 7.* Nemo enim debet ad-
 mitti ad id, quod probatum non revelat, l. 21. *C. de prob. Gail. lib.*
1. Obs. 81. n. 1. & 2. Carpzov. Proc. tit. 13. art. 4. num. 17. Mev. Part. 3.
Dec. 141. & Part. 4. Dec. 51. n. 2. Hinc impertinentes reiiciendi sunt,
 & testes super iisdem examinati nihil dixisse videntur, *Recess. Im-*
per. de anno 1654. §. Wenn nun der Beklagte 45. Ord. Process. Saxon.
tit. 20. §. 7. vers. und hierinne allen unnöthigen Überfluß vermeiden.
 Ruland. *P. 3. lib. 1. c. 4. num. 1.* Carpzov. *Proc. tit. 13. art. 4. num. 15.*
 quod adeo verum est, ut, si manifeste evidenterque appareat, arti-
 culos esse plane impertinentes atque irrelevantes, iudex ne qui-
 dem cum clausula: *Salvo iure impertinentium & non admittendo-*
rum, eos ad probandum recipere possit, ex regula generali, quod
 impertinentia non sint frustra admittenda, l. 13. §. 2. ff. de *iureiur-*
rand. & jura improbent ac detestentur actus frustraneos atque
 superfluos, l. 14. §. 1. ff. *ut leg. caus. caveat*, l. 3. pr. ff. de *iureiurand.*
 Carpzov. *Proc. tit. 13. art. 4. n. 21. Gail. lib. 1. Obs. 81. n. 2. Ruland. P. 3.*
lib. 1. c. 5. num. 3. Quæ omnia nostris procul dubio articulis ac-
 commodari poterunt. Quemadmodum autem (5) actor arti- (5) probato-
 culos suos probatoriales speciatim dictos, quibus actionis suæ riales in specie
 intentionem probare satagit, ex substantia & contentis seu visce- ex libello.
 ribus, uti loquimur, libelli petere tenetur, *Ord. Proc. Sax. tit. 20.*
§. 7. vers. und allein auff dasjenige gesehen / darauff der Sachen
Grund stehet. Carpzov. *Process. tit. 13. art. 4. num. 10. Ruland. P. 3.*
lib. 1. c. 3. num. 7. Gail. lib. 1. obs. 81. num. 5, ita articulos elisivos,
 C 2
 qui-

Elisivi ex re-
plica,

quibus intentionem suae replicae fundare probatamque dare intendit, ex ipsis replicationis momentis meritisque desumendos esse, facile liquet. Replica enim fons est, ex quo articuli elisivi promanare debent, quo quidem non attento, eosdem, seu impertinentes, tam a iudice, quam ab adversario, reiici posse, nullus dubito.

XVI.

Articulorum
elisivorum ma-
teria,

Illud modo est intelligendum, articulos elisivos, usu fori, non solum eos appellari, qui comparati sunt ad elidendas exceptiones peremptorias, sed etiam quibus exceptiones dilatoriae, ante litem contestatam oppositae, oppugnantur. Replica est elisio exceptionis, nullo exceptionum discrimine, sive sint peremptoriae sive dilatoriae saltem. Par igitur ratio sit necesse est articulorum elisivorum, ita, ut ad utriusque generis exceptiones commode referri possint. Amplius nec illud hoc loco praetereundum, quod attinet ad exceptiones peremptorias, nihil interesse, utrum exceptiones sint vere tales, h. e. quae actionem, iure constitutam, repellunt, cuiusmodi est pacti de non petendo, an apparenter saltem, quae ad excludendam actionem non sunt efficaces, v. c. cum reus opponit exceptionem praescriptionis, actor vero replicat de interruptione. Neque enim, quae ab actore replicando interrupta dicitur, vere praescriptio nuncupanda est, nec, quod huic consequens est, exceptio praescriptionis vere talis. Igitur articuli elisivi utriusque generis exceptiones complectuntur. Enimvero repugnantia sunt Ictis, liberari ipso iure, & liberari per exceptionem, l. 34. §. 1. ff. de O. & A. Similiter aliud est, defensionem rei omnino esse nullam, aliud per aliam defensionem replicari & resolvi ius exceptionis. Nam & replicatio ipsa quaedam exceptio est, sed quae a parte actoris venit, l. 2. §. 1. ff. de except. Vicissim autem nihil interest, ipso iure quis actionem non habeat, an per exceptionem infirmetur, l. 112. ff. de R. I. Hinc actio, quae eliditur per exceptionem, dicitur denegari, l. 1. §. 1. l. 7. §. 6. ff. ad Sct. Maced. l. 9. pr. ff. de iurei. dicitur non dari, tit. ff. quar. rer. actio. non datur, l. 53. §. 1. ff. de evict. l. 20. §. 3. ff. de liberal. caus. inspecto

Exceptiones
peremptoriae
apparenter
tales.

vide-

videlicet eventu & effectu. Ratio enim tollendae obligationis, ordoque longe diversus est. Vnde & usu interpretum iam obtinuit, ut omnis generis defensio, quae modo agentis intentionem repellit sive iuris sive facti negatione, exceptio dicatur. Quo pertinet partitio exceptionum, vulgo celebrata, in exceptiones iuris & facti sive intentionis. Pari modo effectu nihil interest, ipso iure quis exceptionem non habeat, an per replicationem infirmetur.

XVII.

Ecquid autem pronuntiabimus de exceptionibus facti sive intentionis? numne articulos elisivos eas etiam complecti existimabimus? Videndum, num replica detur. Fac, reum, conven-tum ex stipulatu, se tueri exceptione acceptilationis. Amplius fac, actorem replicare de pacto acceptilationi contrario, ut petatur, numne pactum habebit vim replicae, consequenter articulo elisivo concludi poterit? Non putem, cum effectu posse. Nam reus facile duplicabit: acceptilatione, exceptionis loco a se opposita, iam ipso iure sublatam esse actionem, atque adeo nullum penitus agendi ius penes actorem relinqui. Neque vero pactum de petendo, post acceptilationem initum, eam habet vim ac potestatem, ut vel novam actionem parere possit, vel veterem resuscitare, ipso semel iure plane pleneque extinctam. Quod quidem de sententia iuris Romani est intelligendum. Atque hoc significat Ictus l. 27. §. 2. ff. de pact. cum ait: *in stipulationibus ius contineri*, id est, per stipulationem novantem, per Aquilianam, eamque securam acceptilationem, hoc assequimur, ut ipso iure liberemur, non facto aliquo nostro, hoc est, non defensionis contestatione, aut acceptilationis exceptione & obiectione. At, pergit idem deinceps: *in pactis factum versatur*, id est, pacta quidem nobis profunt ad liberationem, sed facto nostro, siquis initio litis pactum sit contestatus, eiusque pacti exceptionem in iudicium deduxerit. Haec enim contestatio & defensio cum in facto rei posita sit, recte dicitur, in pactis factum ad liberationem versari: eademq; hic exceptionis & replicationis est ratio. Veluti cum credi-

Utrum excep-
tiones facti
huc pertine-
ant?

Ius Rom.

L. 27. §. 2.
ff. de pact.
explicata.

tor, qui decem mutuo dederat, pactus est cum debitore, ne peteret. Postea cum quereretur creditor, nullam fuisse causam debiti remittendi, obtinuit, ut nova conventio interponeretur, qua placeret, rursus ei petere licere. Hic prius pactum de non petendo non extinguit obligationem & actionem ipso statim iure, quemadmodum nec exceptio, debitori priore pacto quaesita, posteriore pacto de iterum petendo ita tollitur, ut ea agenti creditori in iudicio opponi non possit. Neque enim prius pactum tollitur per posterius ipso iure, sicut stipulatio per stipulationem, si hoc actum sit, puta si novandi animo posterior sit interposita, *d. l. 27. §. 2. ff. de pact.* Vinn. *ad pr. Inst. de replicat.* Secus autem obtinet moribus hodiernis, utpote quibus spectaris pactum etiam nudum ad agendum proficere in vulgus notum est. Quanquam consultius videtur, tum actorem, praetermissa per acceptilationem extincti debiti mentione, illico ex novo pacto, modo petendi causam expresse vel tacite contineat, experiri. Neque non eandem hodie pacto de non petendo, quam Iure Romano acceptilationi, vim esse tribuendam crediderim vel propterea, quia si ex pacto nudo competit actio, consequens est, multo magis pactum de non petendo ipso iure obligationem actionemque submovere, quandoquidem iura priora sunt ad liberandum, quam ad obligandum, *l. 47. ff. de O. & A.*

XIIX.

A^{ct}or, articu-
los elisivos
caute forma-
tus extrahat
commissio-
nem,

Quo vero A^{ct}or suos articulos elisivos caute circumspecteque concipere queat, bene sibi consulit, si prius, quam ad iudicium cum adversario convolet, commissionem a Superiori in causa, in primis intricata, extrahat, & Commissarios vel ipse eligat, vel a Principe pro libero arbitrio constitui petat, qui causam summarie cognoscant, & amicabilem compositionem tentent. Tum enim parres praetextu amicae compositionis, & amore speratae concordiae in iuribus suis ostendendis faciliores esse solent, & sic facile arcana causae suae produnt. Dn. Stryk. *Introd. ad prax. forens. c. 2. §. 20.* maxime quidem, si Commissarii (quam cautelam iis ad litem facilius componendam commendat modo laudatus Dn. Stryk. *c. l. §. 24.*) adversarios ad eundem convictum invitent, ut ita, quod verbis non

non possunt, hilariori potu efficiant. Quo quidem facto actor, licet sibi cum rigido & heteroclito adversario negotium esse videat, qui contendere, quam amicabili compositioni se submittere, malit: eam tamen consequetur inprimis utilitatem, ut exceptiones non solum, quibus pars adversa nititur, sed & earum fundamenta & causas per hoc stratagema expiscari, iisdemque deinceps cognitis perspectisque, momenta replicae eo cautius conquirere, majoremque in articulis elisivis formandis curam ac diligentiam adhibere queat; siquidem tela praevisa minus nocent, nihilque aut parum interesse videtur, utrum reus nullas plane exceptiones habeat, an habeat quidem, quae tamen per actoris replicam elidi submoverique possint, *arg. l. 112. de R. I.*

Qua expiscari possit exceptiones adversae partis.

XIX.

Maxime e contrario actor caveat, ne generalem sibi exceptionem, v. c. *non competentis actionis, tua non interest*, opponi admittat. Nam alioqui cum ignorat genera exceptionum ac fundamenta, quo pacto replicam iisdem opponere, eamque articulis elisivis complecti poterit? Neque enim, quod quibusdam persuasum esse videtur, reus cum ejusmodi exceptionibus generalibus, v. c. tibi non competit actio, tua non interest, & similibus, est audiendus, Brunnemann. *Proc. Civil. c. 16. n. 11.* Exceptio generica nullius est momenti, Vafq. *illustr. controuv. Part. 2. lib. 2. c. 32. n. 13.* ubi hoc Bartotum & Doctores communiter per textum in *l. 36. ff. de legat. 1.* tenere testatur. Imo vero reus, posteaquam ad actoris libellum responderit, illud faciendum habebit, ut omnes suas exceptiones, quascunque habet, congerat & opponat, sed distincte & articulatim & minutatim, nec satis sibi esse puter, contestationem facere generalem, qualis fieri solet, oppositis in globo & in genere vulgaribus exceptionibus iuris carentiae, ut loquuntur, incompetenciae actionis, male agis, tua non interest, & aliis hujusmodi, Talibus enim exceptionibus, non nisi generaliter oppositis, nullam earum rationem habere iudex debebit, Anton. Faber. *in Codice lib. 9. tit. 22. art. 17.* Neque exceptio: actorem non satisfecisse contractui, non expressa causa, relevat, Klock, *Vol. 3. Consil. 149. n. 325.* Enimvero

Exceptio generalis v. c. non competentis actionis, & similibus non est admittenda.

Docto-

(1) quia libellus generalis non admittitur.

Doctores, quos modo commemoravi, rationes, quibus suam confirmant sententiam, in medium non proferunt; haud tamen difficile fuerit, eas in praesens subministrare. Primum enim reus excipiendo fit actor, *l. 1. ff. de except. l. 19. pr. ff. de probat.* Iam actori non licet libellum actionis generaliter, absque specialis causae debendi, & iuris, ex quo agat, expressione, concipere. Et in actione quidem reali causam proximam, v. c. dominium vel quasi; in actione vero personali remotam, eamque specialem, puta contractum, delictum, aliudve, propter quod reum sibi obligatum esse existimet, exprimi oportet, *l. 14. §. 2. iunct. l. 11. §. 2. ff. de except. rei iud. c. ult. X. de libell. oblat.* Quodsi ergo agendi causa in sola & simplici obligatione, expresso licet fundamento generali, v. c. contractu, non speciali, v. c. emti venditi, fundetur, libello obscuritatis & generalitatis exceptio obstat, qua opposita, pronunciatur: daß Beklagter auf die Klage / immassen sic anbracht / sich einzulassen nicht schuldig. *Don. Svendendorff. Proc. Fib. p. 279. & seq.* Libellus igitur debet esse specialis, non generalis, quippe quem iudex nunquam admittere, sed ex officio etiam, parte altera licet non petente, reiicere, & dentibus, uti vulgo loqui amant, lacerare tenetur, *Mev. P. 1. Dec. 42. & P. 3. Dec. 92.* Quemadmodum itaq; actor causam actionis specialem exprime-re iubetur; ita quoque reus ex natura correlativorum causam exceptionis designare, hoc est, speciales exceptiones opponere tenetur. In praeparatoriis enim iudicii favorabilior reo habetur actor; hinc in dubio libellus in favorem actoris est interpretandus, *l. 66. ff. de iudic.* Quod ergo actori circa libellum actionis non permittitur, quod ore idem reo, quod ad exceptiones attinet, licere dicemus? *arg. l. 41. ff. de R. l.* Quodsi urgeas, imo vero exceptionum momenta ad medium iudicii esse referenda, in promptu est, quod replicari possit, nempe in medio actorem & reum ad paria diiudicari, *Bachov. ad Treutl. Vol. 1. disp. 5. tb. 1. lib. B.*

XX.

Quotus quisque porro non animadvertit, reum in fraudem articulorum elisivorum generalem exceptionem opponere minime posse? In iudiciis enim, & maxime quidem, spectanda est aequitas,

l. 4.

l. 4. §. 1. ff. de eo, quod cert. loc. Iam iniquum fuerit, obscura rei exceptionum oppositione actori replicandi, formandique articulos elisivos, occasionem praecidi. Quid, quaeso, consilii reliquum actori existimes? Si obmutescat, quippe cum non habeat, quod reget & replicet, causa omnino cadit, iureque suo plane excidit; Contra vero reus versutus, hoc adhibito stratagemate, absolvitur. Sin autem replicet actor, & ad replicam hanc probandam formet articulos elisivos, in bivio ac incerto versatur, nescius, quid factu opus sit, ne sub iustissimae causae clypeo per adversarii versutiam misere succumbere opus habeat. Quodsi hoc permetteretur, omnes sane rei, qui nunquam non subterfugia quaerere solent, atque ideo non immerito *Φύγοις* seu fugientes saluantur, nulli penitus bonitati causae confisi, hac cautela catervatim uterentur, eamque non sine inligni actoris iniuria ambabus manibus arriperent, cum hoc modo iudicium declinare, actorisque intentionem eludere possent.

XXI.

Itaque cautela, quam nonnulli, nescio quo argumento, commendant, ut reus litis contestationi factae subiungat exceptionem ^{Sed reus cadit} saltem generalem v. c. non competentis actionis, eaque actori intervertat copiam potestatemque formandi replicam, concipien- ^{reprobatione.} dique articulos elisivos, vix se tuetur. Imo vero hanc esse idoneam ex parte rei cautelam tantum abest, ut ea potius in odium detrimentumque ipsius rei converti posse videatur. Actor namque hanc ipsam rei calliditatem parili facile calliditate compensabit, atque obtendet, reum perinde esse habendum, ac si plane non excepisset: paria esse, non excipere, vel excipere quidem, sed illegitime: exceptionem oppositam non oppositam intelligi, neque attendi, atq; quod huic consequens est; rerum deinceps cum reprobatione non esse audiendum: articulos item super exceptionibus, ^{Quam si actor fieri permittit, non habet reprobationis reprobationem.} non statim post litem contestatam, sed multo post expressis determinatisque, conceptos esse impertinentes, *arg. Ord. Proc. Elect. Sax. tit. 21. §. 4.* Amplius si actor pro oscitantia sua nihilo secius reo permitteret, ut articulos reprobatorios super exceptionibus speciali-

bus, modo expressis, formaret, dubitari posset, utrum actor ad reprobationis reprobationem foret admittendus. Enimvero *prædict. Ordinat. Proceff. tit. 21. §. da auch in fin.* cautum legitur, reprobationis reprobationem toties habere locum, quoties reus admittitur ad deducendas exceptiones, litis contestatae tempore minus oppositas, hanc quidem ob rationem, quia actor propter iustam ignorantiam ad incognita articulos extendere non potuit. Iam par ratio, idemque ignorantiae gradus esse videtur in exceptione, generatim litis contestationi annexa, & postmodum in reprobatione speciatim deducta; neutro enim casu actorem exceptiones articulis probatoriis refutare potuisse, palam est. Verum quemadmodum locus iste ad eum saltem casum adstrictus legitur, cum reo exceptiones aliquae, de quibus tempore contestatae litis notitiam non habuit, noviter supervenerunt: ita facile apparet, rationem exceptionis consistere in eo, quod per actorem non stetit, quo minus intra terminum Saxonicum probationes suas super replica, atque adeo per articulos elisivos, expedire potuerit; Contra vero nemo non intelligit, actorem illo casu culpa haud vacare, dum tempestive, & re adhuc integra, ne reus ad reprobationem admitteretur, non fuit protestatus, aut saltem, ut a reo exceptio, generatim opposita, declararetur, postulavit. Cui quidem sententiae inserviunt argumenta, quae in simili produxit Berlichius *Part. 1. Dec. 50. n. 16. seqq.*

XXII.

Generalis
clausula, præ-
missis excep-
tionibus spe-
cialibus anne-
xa, non ex-
pressas haud
complectitur.

Neque melior est illa cautela, quam iam sua aetate ab Advocatis esse tentatam, Vasquius testatur *illust. controuv. Part. 2. lib. 2. c. 32. n. 19.* ut reus post aliquas exceptiones, nominatim oppositas, subiiciat, se opponere omnes exceptiones, sibi undecunque competentes. Nam illa etiam clausula, cum nimium generalis atque adeo incerta sit, minime sufficit, secundum communem sententiam, quam refert atque deprædicat idem Vasquius *c. l.* Neque vero eidem clausulae subsidio itur, si vel maxime *ex l. 4. §. 4. ff. si quis caution.* argumentum huc arcessere velis. Locus quippe ille agit de renuntiatione exceptionum generali, renuntiationi præ-

praemissarum aliquot specialium subnexa; atque id arguit, generalem renuntiationem in casibus etiam non-expressis idem operari, quod renuntiatio specialis, modo exceptiones expressae quadam quasi affinitate exceptionibus non-expressis coniunctae atque connexae sunt, ut ita colligi possit, probabiliter de reliquis fuisse cogitatum. Exemplum est in beneficiis fideiussorii. Fideiussor renuntians speciatim beneficio ordinis, subiuncta renuntiatione reliquorum fideiussoriorum beneficiorum generali, iisdem valide se abdicat. Sed inde minus recte colligas, expressis modo aliquibus exceptionibus specialibus, subtextam exceptionem generalem reliquas omnes, quae quidem cum expressis nullam habent cognationem, sed ab iisdem substantia ipsa discrepant, valide ambitu suo complecti.

XXIII.

Quod autem Antonius Faber *in Codic. lib. 9. tit. 22. art. 17.* Reus modos amplius tradit: neque illarum quidem exceptionum, quae in probandi exceptiones ex- specie ac nominatim oppositae fuerint, iudicem habere rationem primere non oportere, si non earum quoque media & extrema eodem actu teneatur. contestationis specificae deductae sint &c. idem illud iure, vel Iustiniano, vel Saxonico, & quod huic se conformavit, Imperii iure, vix obtinere videtur. Iure Iustiniano quidem contestatio amplius necessaria non est, sed exceptiones indifferenter lite contestata opponuntur, *l. 2. C. sent. resc. non posse.* Bachov. *ad Treutl. vol. 2. Disp. 26. §. 5. lit. C.* & tractantur usque ad sententiam, *l. 4. §. 8. C. de except.* Saxonico autem & imperii novissimo iure certo certius est, reum partibus suis bene functum videri, sicubi litis contestationi exceptiones peremptorias, easque in universum omnes, simul subiecerit, *Ord. Proc. Elect. Sax. tit. 11. §. 38* soll aber/ Receff. *Imp. de ann. 1654. §. 37. §. 38.* Sufficit, inquam, exceptionum oppositio, quemadmodum ex verbis: *einbringen/einwenden* / quae dictis textibus habentur, lucide arguitur; neque requiritur, ut reus pariter argumenta probationis, quibus exceptiones oppositas probare intendat, exprimat ac designet, quod quidem fieri, licet actori ad tanto melius fundandam replicam, deducendosque articu-

tuculos elisivos utile sit : tamen non est necesse, cum nusquam
 praeceptum intelligatur, usus quoque iudiciorum quotidianus
 aliud comprober. Quamobrem aliam auctori cautelam, pro ex-
 trahenda scilicet commissione, ad obtinendum illum scopum sub-
 ministravimus §. 18. Quod autem dixi: non necessariam esse mo-
 di probandi adiectionem, iure Saxo. est intelligendum de sola
 probatione ordinaria. Namque reus, si velit super una alterave
 exceptione deferre iuramentum, hoc ipsum statim post litem con-
 testatam facere, vel sibi saltem iuramenti delationem reservare te-
 netur; non reservata deinde in sententia haud attenditur, & fru-
 stra a reo urgetur. Quamquam sane aequius est, a reo post litem
 contestationem reservatam, licet sententia expressis verbis non
 contineatur, tamen clausula sententiae apponi solita: *und andere
 redtliche Nothdurfft* / intelligi, Dn. Svendendorff. *Proc. Fibig. p.
 1391.* Amplius necesse non est, ut reus exceptionum, speciatim
 oppositarum, speciales etiam circumstantias adiiciat; sed sufficit
 omnino, eundem ipsas exceptiones designasse, ut intelligatur,
 quatenam obiectae fuerint. Vnde non repudianda est exceptio,
 cum reus litem contestatus dicit: *Es sey eines und das andere auf
 die libellirte Schuld bezahlt.* Quibus quidem verbis satis liquido
 indicat exceptionem solutionis, nec magis summam sive quanti-
 tatem solutam designare tenetur, quam ipsum tradere probandi
 modum.

XXIV.

Actor super
 articulis elisi-
 vis iuramen-
 tum deferre
 potest.

Haftenus ergo de formandis cauteque concipiendis articu-
 lis elisivis solliciti fuimus, iuxtaque auctori cautelam suggesti-
 mus, ne generales exceptiones sibi opponi concedat, sed strenue
 urgeat, ut reus causam specificè exprimat, quo suos articulos eli-
 sivos concinne ac congrue formare queat: Neque vero sufficit,
 eos ipsos circumspecte confectos esse, sed necessitatis ratio iubet
 porro atque postulat, ut legitime probentur. Quod si igitur actor
 videat, se articulos suos elisivos, argute quidem conceptos, per
 testes tamen vel instrumenta probatos dare non posse, vel etiam
 illud ipsum sibi propter nimiam ordinariae probationes prolixita-
 tem,

tem, non consultum proficuumque fore existimet, cardo quaestio-
nis in eo vertitur, utrum actor in defectu aliarum probationum, vel
si citius se lite extricare, sumtibusque in producendis testibus par-
cere velit, super articulis elisivis iuramentum reo deferre queat? *Iure Civili.*
Iure quidem Civili id licere, nulli dubitamus, quippe quo expresse
constitutum legitur, iuramentum in quovis iudicii articulo de-
ferri posse, *l. 12. C. de reb. cred. & iureiurand.* Quod quidem proce-
dere volunt, etiam si actor probare coeperit & a probando destite-
rit, imo probaturus defecerit. *Franzk. tit. de iureiurand. num. 108.*
Amplius eum, qui in prima instantia ob inopiam probationum
succubuit, in secunda adhuc iuramentum deferre posse, statuit Me-
vius *Part. 4. Dec. 5.* Alii vicissim, termino etiam probatorio prae-
terlapso, iurisiurandi delationi locum esse, quos commemorat ac
sequitur Brunnemannus *ad d. l. 12. n. 15.* Ideoque non immerito
dicitur maximum expediendarum litium remedium, *l. 1. ff. de iu-
reiurand.* omnis controversiae finis *ad Hebr. V1, 16.* & venuste
τὴν σωτηρίαν καὶ ἀσφυγὴν, novissimum refugium, Nov. 73, cap. 4. vid. Wis-
senb. *Disputat. ad n. 24. tb. 18.* Nemo itaque, opinor, fuerit, qui
iure Civili super articulis elisivis iuramentum deferri posse, vel
leviter ambigat.

XXV.

Ius vero Saxonicum quod attinet, id aliquibus nos involvit *Iure Saxoni-*
dubiis, utpote quo, si vel guaranda praestita, vel lis pure absque *co.*
reservatione contestata est, actor iusiurandum deferre, & eventum
litis causaeque victoriam conscientiae rei committere non potest,
sed illud ipsum vel ante guarandam praestitam vel litem pure rite-
que contestatam, pro more fori Saxonici facere tenetur. Alteru-
tro horum facto, actor, iuramentum deferens, ulterius non audit-
tur, *Ord. Proc. Sax. Elect. tit. 18. pr. vers.* iedoch daß es ic. licet ante
litem contestatam, vel guarandam praestitam, protestando sibi
facultatem deferendi iuramentum reservasset, *dict. Ord. tit. 18. §. 1.*
vers. ob er gleich zuvor derentwegen protestiret. Quemadmodum
igitur replica post litem demum contestatam ad elidendas exce-
ptiones opponitur: ita super ea, & quod huic consequens est,

super articulis elisivis non deferri posse iuramentum videtur. Verum enim vero actor replicando fit reus, & replicatio nihil est aliud, quam exceptio actori competens, ad exceptionem rei excludendam & refutandam, *l. 2. §. 1. ff. de except. princ. Inst. de replicat.* Hinc etiam dicitur contraria exceptio, quasi exceptionis exceptio, *l. 22. §. 1. ff. de except.* nec non privilegio exceptionum gaudet, *l. f. ibique Dd. C. de edend.* Imo actoris replicantis partes favorabiliores esse solent, quam quidem partes rei excipientis, *Gloss. in dist. l. f. C. de edend.* Sicuti itaque reus, iure etiam Saxonico, super exceptionibus post litem contestatam oppositis deferre valet iuramentum: ita rationis est, actori quoque super replica, post litem contestatam, id facere licere, maxime cum praefagire & divinare facile non possit, quas exceptiones reus animo suo complectatur, quibus elidendis statim libello inserat replicam. Accedit, quod ius Saxonicum hac parte sit exorbitans a iure Communi, quemadmodum praecepimus, atque adeo, ut conceptis verbis solum de ipso libello, eiusque causa & fundamento, loquitur *Part. 1. Conf. 11.* ibi: *der Kläger nicht mehr Macht haben soll / den Grund der Klage dem Beklagten / wie auf Sächsischen Boden gebräuchlich / zu deferiren / &c. & Ord. Proc. tit. 18. §. 5.* *So der Kläger / ibi: die Klage ins Gewissen schieben / und den End der wegen* deferiren wolle / &c. ita de hoc solo casu explicandum: Ceterum idem ius Saxonicum de iuramenti delatione, qua actor ad fundandam replicam utitur, mentionem facit nullam. Igitur in hoc processu articulo facultatem deferendi iusiurandum intactam illibatamque dispositioni iuris Civilis reliquisse censetur. Quam etiam sententiam autoritate consult. const. Saxon. *Tom. 1. Part. 1. quaest. 64. n. 2. sub fin. §. 3.* innixus sequitur Berlichius *Part. 1. Concl. 29. n. 66. §. 67.* ac quotidiana in foro experientia comprobatur.

XXVI.

Modo iure
Sax. in ipsa
statim repli-
ca iura-

Modo intelligamus, actorem debere statim in ipsa replica deferre reo iuramentum, aut certe super ea delationem iusiurandi, deinceps in articulis elisivis faciendam, sibi reservare. Quo-
rum

rum quidem alterutro non facto, res non est integra, ut actor postmodum super articulis elisivis iuramentum deferre possit, argumento videlicet iterum a reo ducto, utpote quem super exceptionibus, litis contestationi subnexus ante iniunctam acceptatamve reprobationem deferre iusiurandum oportet, *Ord. Proc. tit. 18. §. de aber.* idque vel formaliter ac realiter, vel certe virtualiter & verbaliter per reservationem, ut loqui amat Dn. Svendendorff. *Proceff. Fibig. p. 1391. n. 3.* Postea enim iuramenti delatio non admittitur, siue fiat in articulis reprobatoriis, siue non. Quod itaque iuris conceptis verbis in reo excipiente hoc loco constitutum legimus: idem etiam ad actorem replicantem, qui illius iure censetur, esse accommodandum, & ratio præcipit, & iuris imperat analogia. Ita quidem vulgo statui solet. At enim, re diligentius cogitata, verius est, non necesse esse, ut actor factæ litis contestationi statim subiiciat replicam, super eave deferat iusiurandum, aut potestatem deferendi iurisiurandi sibi servet, prouti satis, opinor, a nobis demonstratum est *disquisit. quousque actori, reove, in foro Sax. Elect. liceat deferre iusiurand. ib. 3.*

XXVII.

Cautus tamen sit hoc loco actor, ne replicam libello statim inserat, maxime si, quo pacto eam probatam dare possit, aut utro probandi genere uti, consultius sit, nondum satis intelligat. Atque adeo expectet potius, donec reus excipiat, quo deinceps super ipso probandæ replicæ modo sensa animi sui colligere queat. Alioqui replica, libello protinus inserta, habebitur pro parte libelli, de qua post licem, a reo contestatam, vel guarandam, ab actore præstitam, iurisiurandi delatio in foro Saxonico locum sibi vendicat nullum, neque articuli inde formati proprie reputantur pro elisivis. Age vero, rem exemplo, quod in summo Provocationum iudicio Elect. Saxon. accidit, illustremus: Actor instituit hereditatis petitionem, non simplicem tamen, sed qualificatam, puta nullitatis querelam; Ait enim: se esse quidem heredem ab intestato, reum vero possidere hereditatem, eamque prætextu testamenti, sed vicio nullitatis laborantis, Caveat actor, ne replicam libello inserat, si deinceps super ea iuramentum deferre velit.

Reus

Præiudicium in praxi.

Ratio dubi-
tandi.

Reus litem contestatur, atque testamenti exceptionem opponit. Actor autem replicat, testamentum esse nullum, formatque ex hac replica articulum elisivum, & reo de eodem iuramentum deferret. Quaerebatur ergo, utrum locum haberet iuramenti delatio? Qua de re variantibus Patrum sententiis fuit pronunciatum. Pro affirmante quidem sententia militat, quod nullitas testamenti non principaliter, sed solum incidenter & eventualiter in casum futuræ exceptionis libello inserta fuerit; quandoquidem certo non constabat, utrum reus exceptionem testamenti oppositurus sit, nec ne; ut proinde articulus omnino haberi debeat pro elisivo, super quo iurisiurandi delatio licita est.

XXVIII.

Rationes de-
cidendi.

Contra vero sententia negans non minus suis se fulcit rationibus. Namque nullitas testamenti hoc casu omnino est pars libelli, atque adeo secundum regulas processus Saxonici iuramentum super eadem, tanquam libelli parte, ante litis contestationem deferri debuit. Quinimo re penitus exactiusque considerata, in exemplo proposito, non simplex hereditatis petitio, sed querela nullitatis, in iudicium est deducta, quæ, cum ad impugnandum testamentum sit comparata, non potest non simul exceptionem testamenti præsupponere. Querelæ nullitatis testamentariæ duo sunt fundamenta, alterum ius succedendi ab intestato, alterum nullitas testamenti, quæ quidem quo pacto concipi poterit absque prævio testamento, cuius obtentu uti se reus excipiens tuetur; ita contra actor idem statim in libello nullum esse queritur? Ac quemadmodum actori visum fuit, in eventum oppositæ exceptionis, replicam intexere libello: ita idem poterat, imo debebat, in eundem eventum iuramentum super ea deferre. Nec est, quod dicas, actori certo non constitisse, utrum etiam reus hanc, quam præfenserat, exceptionem sit oppositurus, nec ne; siquidem actor sibi de facili persuadere potuit, reum tam obsecratis non fore, qui, cum tabulis testamentarias in manibus habeat, illas in medium non proferat, & sic exceptionem testamenti opponat, quod nisi illum facturum credidisset, replicam sane libello

non

non inseruisset. Si instes: actorem tamen ignorasse ea, quae exceptionem, a reo deinceps oppositam, circumstant, in primis ejusdem probandae rationem; in promptu est, quod respondere possum, reum nempe, quemadmodum supra praecepi, modum, quo probaturus sit exceptionem, exprimere neutiquam teneri. Et fac tandem, illud, utrum reus exceptionem, cui elidendae replica libello inserta est, oppositurus sit, nec ne, actori certo non constituisse; nihilo tamen minus idem habet, quod sibi imputet, & de seipso queratur, quod nullis plane probationibus instructus, caeco quodam quasi impetu, replicam libello inseruerit, aut non statim super eadem iuramentum detulerit, cum nondum certus fuerit, utrum etiam reus exceptionem, quam verebatur, sit oppositurus, nec ne. Si igitur damnum aliquod se incurrere sentiat, discat in posterum cautius mercari, *arg. l. 2. C. de furt.* Alioquin hac rationis generalitate admissa, eo etiam casu, sicubi aliquid a reo negaretur, in cuius probatione actor deficeret, idem respondere posset, se non putasse, reum sibi hoc inficiaturum, atque adeo iuramentum deferre valeret, quod tamen iuri Saxo-nico oppido adversatur. Facit huc argumentum, ab inspectione oculari petatum. Haec enim, licet regulariter etiam post conclusionem in causa, & ipsam quoque sententiam, admittatur, *Berlich. Part. 1. Concl. 47. n. 30. seqq.* tamen sicubi ab alterutro litigantium, tanquam caput probationis, reprobationisve, inducta sit, ad fatale adstricta censetur, neque eo deinceps praeterlapso, repeti potest. Similiter integrum quidem est actori, super replica deferre iuramentum, modo eam naturae suae & ordini relinquat, nec statim libello interferat, ne alioqui beneficio replicae semetipsum abdicasse intelligatur. Aut igitur actor super replica, libello inserta, statim iuramentum reo deferat, aut, si de modo probandi replicam adhuc dubitet, eandem in libello omittat. Quanquam in eo nihil interest, utrum actor super replica, libello inserta, conjunctim, an separatim, & demum in termino, deferre velit iuramentum, modo re integra, h. e. ante litem contestatam, vel praestitam guarandam, deferat. Quemadmodum etiam,

Argumentum
ab oculari in-
spectione,

Iuramentum
super replica
in termino de-
ferri & revoca-
ri potest,

E

eidem

eidem liberum est integrumque, antea in libello factam iuramenti delationem deinceps in termino revocare. Neque enim, cum ista saltem ad rationem probandae intentionis attineat, atque adeo partem solum externam & accidentalem libelli constituat, libelli inde mutati exceptio valide obici poterit.

XXIX.

Replica libello
inseri potest.

Quamquam id
non probetur
per l. s. C. si
adv. rem iud.

Actorem autem, sicubi id sibi proficuum existimaverit, & vel per iuramenti delationem eventum victoriamque litis conscientiae statim rei committere voluerit, vel etiam sese legitimis optime instructum intellexerit probationibus, citra ineptitudinem libello replicam inserere posse, non refragatur. Illud enim per se verum & iure maxime permixtum est, quod liceat facere mentionem exceptionis rei & replicationis actoris adversus illam, velut occurrendo tacite obiectioni, quam fieri posse praesenserat actor, prout testantur *ad l. 2. C. si advers. rem iud. restit. postul.* Bartolus, Baldus, Angelus, Fulgosius, Castrensis, & Franciscus Arretinus, quod & aliis locis traditum est ab Innocentio *ad c. 20. X. de Rescript.*

Et ad c. 18. circa fin. X. de sentent. Et re iud. Quamquam sane idem ille concipiendi libellum modus, secus ac Interpretibus, abs me commemoratis, persuasum est, ex adducta *l. 2. C. si advers. rem iud.* non extruitur. Nam lis illa de patria potestate inter patrem & filium apud Proconsulem hic recitatur, ut antea & peracta, non quod ea nunc agatur, aut primum instituatur eis verbis, quae hic fertur dixisse pater: Nihil ergo prohibet dicere, non totum hoc, quod hic narratur patrem dixisse, una vice & in actionis suae prima institutione ab eo esse dictum, sed compendiose recitari verbis paucissimis actionem patris, cum diceret filium in sua potestate esse: exceptionem filii ex emancipatione, & replicationem patris, quod ea non iure esset facta. Sicut & causae cognitio & Proconsulis pronuntiatio, quae ad eandem litem pertineat, & quorum mox subiicitur mentio, non simul cum praedictis omnibus, sed ex ordine iudiciorum iusto intervallo intervenerunt & secuta sunt. *Mud. eius ad d. l. 2. conf. Dn. Praefidis Comment. ad l. 2. C. qui Et advers. quos. novissime editum, ubi lb. 28. seq. eandem legem plane plene.*

pleneque interpretatur. Nihilò tamen secius sententiam istam non destituit iuris nostrianalogia, neque quicquam valide asserri potest, quod ei refragetur. Vnde etiam praxis & usus fori eandem servat, ut recens docet præiudicium: Coniuges conferant pacta dotalia, prædefuncto vero marito, vidua, eo, quod in portione statutaria se nimis laesam intelligeret, voluntatem mutat, missisque pactis dotalibus, portionem, pro illius loci consuetudine constitutam, petit; sed, cum vereatur, ne reus, i. e. præmortui mariti heres, excipiendo, pacta dotalia sit oppositurus, libello statim replicam restitutionis in integrum ex causa ætatis inserit, seque eo tempore in minorenni adhuc ætate constitutam fuisse, asserit, atque adeo in casum futuræ exceptionis beneficium restitutionis in integrum ex capite minorennitatis implorat. Quem libellum Senatus in summo provocationum parlamento Elect. Sax. omnino valere pronuntiavit in causa Schærin contra Robert Rinder Anno 1695. Termino Brumali,

Præiudicium
in praxi,

XXX.

Diligenter vero perpendat ac secum deliberet actor prius, quam replicam libello inserat, an sibi id etiam consultum videatur: Semper enim illud proficuum sibi non esse, sed multis interdum periculis expositum, sentiet; siquidem, cum exceptionis rei, suæque adversus illam replicationis, in libello mentionem facit, reo suggerit exceptionem, de qua forte, vel nunquam cogitasset. Deinde, quod deterius est, reus relevatur ab onere probandi exceptionem ob allegationem actoris, quæ vim confessionis habet, Castrensis *ad l. 2. C. si advers. rem iud. rest. in integ. postul.* Quod ipsum se experimento didicisse, testatur Mudæus *ad eandem legem*. Amplius actor post litis contestationem super replica, libello inserta, in foro Saxonico iuramentum deferre nequit, ut supra fuse tradidimus. Denique actor ad probandam replicam, quam libello inseruit, editionem instrumentorum a reo petere non valet, quippe qui instructus & paratus in iudicium venire debet, *l. 4. l. f. C. de edend.* Vnde proprias probationes suæ intentionis, atque adeo etiam replicationis, quam libellus æque complectitur, as-

Non tamen
semper con-
sultum est,

ferre, non ab adversario petere tenetur, *l. 7. C. de test.* Nemo enim proprio se gladio iugulare iubetur, *l. 1. f. C. de edend.* Nimisque grave fuerit, urgeri reum ad editionem eorum, per quae sibi negotium fiat, *d. l. 7. C. de testib.* Cum vero actor libello replicam non inseruit, ad eam probandam, a reo editionem instrumentorum postulare omnino potest. Replicando enim fit reus, & replicatio nihil est aliud, quam exceptio, ex parte actoris proveniens. Quemadmodum igitur ad exceptionem fundandam reo actor tenetur edere documenta: ita similiter reus actori ad probandam replicam, *arg. l. ult. in fin. C. de edend.* Nec est, quod actori imputetur, cur instructus non venerit in replicationibus, ad elidendas exceptiones oppositis, praesertim cum ex facto alieno posteriori oriantur, & ita eorum ignorantia probabilis sit, *arg. l. f. §. f. ff. pro suo l. 42. ff. de R. I.* Atque pro eadem sententia facit textus in *l. penult. §. f. ff. ad L. Falcid.* ubi Scaevola, replicantibus legatariis contra heredem, obiiicientem Falcidiam, edenda esse omnia instrumenta, docet. *conf. Tellez. ad c. 1. X. de probat. n. 17. Berlich. Part. 1. Concl. 45. n. 49. Carpzov. 3. Resp. 78. n. 14. seq.* Ex quibus illud etiam consequitur, quum rei multis modis, ne fiat, interfit, non licere deinceps actori temere variare, vel replicam denuo libello inferere, vel insertam semel dimittere. Caute igitur actor circumspicteque omnino agat, cum tot periculis se suppositum intelligat, ne nimis festinet, & inconsulte forsitan replicam libello inserat, ex quo deinceps damnum ferat, &, vulnerata causa, remedium quaerat, sed vix inveniar.

XXXI.

Tum vero maxime utile commodumque fuerit, replicam libello intexere, cum ea altioris est indaginis, atque adeo non nisi per testes, delationemve iuramenti, probari potest; contra vero exceptio, cui elidendae replica libello inseritur, liquida est, atque adeo in documento aliquo guarentigionato innititur. Alioquin ubi actor, expectata prius exceptione, deinceps subnectit replicam, ad eam probandam non admitteretur. Quemadmodum enim, actore ex documento guarentigionato executive agente,

reus

Replica altioris indaginis adversus exceptionem in continenti li- quidam consulo libello inseritur.

reus cum exceptione, eaque vel per testes vel iuramenti delationem probanda, omnino non, i. e. nec ante, nec post factam documentum producti recognitionem auditur: ita nec gravabitur actor, missam facere replicam, in altiori consistentem indagine, adversus exceptionem rei, in continenti liquidabilem; cum sane actor plus sibi iuris arrogare adversus reum non valeat, quam reus adversus actorem.

XXXII.

At enim vero hoc loco insigne exsurgit dubium, quod reus non possit praevenire actorem, & ad impediendum processum executivum de exceptionibus, in continenti non-liquidabilibus actionem instituere ordinariam, propterea, quoniam, cui denegatur exceptio, idem multo magis deneganda est actio, atque vicissim ea, quae ad agendum profunt, multa magis proficiunt ad excipiendum. Amplius praeventio, ut locum habeat, praerequirat paritatem processus, cum alioqui creditor commodo processus executivi, quod ipsi directo auferri nequit, indirecte & veluti per anticipationem reconventionis privaretur, Carpzov. *Part. 1. Decis. 52*, Dn. Svendendorff. *Process. Fibig. p. 324. seq.* Ex quo consequitur, idem illud multo magis esse affirmandum de creditore, quo minus ille possit in fraudem exceptionis, in continenti liquidae, replicam suam, in altiore indagine consistentem, libello statim inferere.

Rationes
dubitandi.

XXXIII.

Verum intelligendum est, doctrinam, ex Carpzovio & CL. Svendendorffero fundamenti loco adductam, sua non carere difficultate. Quod si enim, in quo fortasse nec Carpzovius nec ipse Dn. Svendendorfferus refragabuntur, actor replicam altioris indagine ad impugnandam exceptionem, in continenti liquidam, libello inferere potest, consequens est, etiam reum posse praevenire actorem, quo minus executiva via experiri valeat. Aut itaque utrumque negandum, aut utrumque est asserendum. Affirmantis sententiae ratio est aequitas, primum quidem in *actore*, ne dolo petat per viam processus executivi, quod reo mox in ordi-

Rationes
decidendi.

nario est restitutus. Deinde in *reo*, ne dolo detrāctet solvere obtentu documenti cuiusdam guarentigionati, quod tamen postmodum soluturus est, instituto ad impugnandum documentum guarentigionatum ordinario processu. Imo maior esse ratio in actore videtur, ne a reo ex subtilitate processus executivi petat, quod deinde in iudicio reconventionis eidem restituere tenetur, quam quidem in reo, subsidio instituti per praevencionem iudicii ordinarii aliquam saltem dilationem anhelante; Quandoquidem iura semper prouiora sunt pro debitore liberando, quam pro petente creditore. Accedit quod processus executivus moribus Germanicis praeter, verius dixeris, contra iuris communis rationem invaluerit, atque adeo strictam recipiat interpretationem, ut nihilo secius utrobique locus sit praevencioni, & qua libertate reus actorem praevenire, suamque exceptionem per modum implorationis proponere potest: eadem etiam actor praevenire reum, atque replicam suam, in vim elidendae exceptionis, in continenti liquidae, libello ordinario inferere valeat. Neque vero haec ipsa, Carpzovii & CL. Svendendörfferi doctrinae commemoratae contraria sententia caret autoritate. Namque vel ipse CL. Schilterus in suo nunquam satis laudando opere ad Pandectas, quanquam *Exerc. 22.* processum executivum ex genuinis fundamentis repetit, & maximopere amplificat, atque principia ex iure Romano, praesertim de natura & indole exceptionis non-numeratae pecuniae peregrina, moribusque patriis oppido adversa, ad eundem processum perperam vulgo produci docet; nihilo tamen secius *Exerc. 13. tb. 19.* pro cautione notandum scribit, ut, qui scripturam alteri dedit, adversus eam autem suam exceptionem non nisi per testes aut iusiurandum probare valet, adversarium praeveniat, & ipse conditionem chirographi, aut, pro re nata, actionem ad edendum, vel similem non ineptam, quo tanto liberiori probationum campo deinceps gaudeat, in processu Ordinario instituat.

CL. Schilteri
sententia.

XXXIV.

Enimvero, quo doctrinae Carpzovii ac CL. Svendendörfferi
sua

Carpzovius
& CL. Svendendörfferi

sua quoque constet autoritas, non deesse videtur ratio discriminis, inter creditorem & debitorem interiecti. Debitor enim, dum exceptione sua, in altiore indagine adhuc consistente, creditorem praevenire satagit, actoris vicem pariter sustinet, atque id saltem intendit, ut creditori tanto difficilius ius agendi reddat, eidemque commodum processus executivi eripiat. Iam cum debitor pariter ac creditor actoris vice fungi volunt, ratio praecipit, eius esse partes potiores, qui faciliorem moribusque domesticis magis convenientem insistit viam, puta creditoris, utpote qui executiva agendi ratione experitur, cum e contrario debitor ordinarium sibi saltem propositum habeat procedendi modum. At creditor, cum replicam statim libello inserit, minus concurrentem in agendo habet debitorem, neque ex illo solo fundamento, cui impugnando obici queat exceptio, in continenti liquida, instituit actionem, sed ex alio, eoque simul ad destruendam exceptionem assumpto. Qua igitur fronte reus se tuebitur sola exceptione, eiusque in continenti liquida probatione, cum ad eam infringendam modo actum sit? Neque vero tam rei interest, quo minus actor replicam altioris indaginis statim adversus exceptionem, in continenti liquidam, inserat libello, quam quidem actoris, quo minus reus cum, in instrumento guarentigionato innixum, exceptionem, in altiori etiam indagine consistentem, per modum actionis intentando praeveniat. Actor, quum via experitur executiva, protinus, quod petit, consequitur, neque prius, quam ipsi eo nomine satisfactum sit, reo reconvenienti tenetur respondere. At reus, quum actor, praevisa exceptione, in continenti liquida, statim ad eam excludendam agit, non habet, de quo queratur, cum actoris in arbitrio sit, utro modo experiri velit, ipsius etiam rei interfit, duplici cum lite non vexari; sed potius statim replicam in iudicium deduci, de eaque disceptari.

XXXV.

Stet igitur immota, quam modo munivimus, sententia, con-
sultum esse actori, ut ad destruendam exceptionem, in continenti
liquidam, libello statim replicam, in altiore consistentem inda-
gine

denos offerus
defenduntur.

Actor repli-
cam altioris
indaginis li-
bello non in-
finge

reus, & per
exceptionem
liquidam suc-
cumbens, pe-
culiari actione
experiri valet.

Ratio deci-
dendi.

gine, inserat, propterea, quod alioquin, opposita ad impediendum litis ingressum exceptione, replicaturus non audiatur, sed pronuntietur: daß Beklagter auff die Klage sich einzulassen nicht schuldig. vel: Daß die Klage nicht statt hat. Quid autem, numne actori liberum erit integrumque, replicam deinceps nova separataque actione, ad destruendam convellendamque exceptionem, in iudicium deducere? Affirmans sententia mihi quidem verior benigniorque videtur, cui etiam addictum esse Mevium *Part. 3. Dec. 226.* intelligo, multumque laetor. Ratio, qua in primis moveor, haec est, quod, quae circa reorum exceptiones observantur, ea iure meritoque circa actorum replicas sequimur. H. Pistor, *Part. 4. quæst. 23. n. 39.* Vt igitur illae (exceptiones) altioris indaginis non excludunt a iudicio super actione, imo ne tum quidem, cum reconventio per sententiam expresse non fuit reservata, Dn. Svenden-dörff, *Process. Fibig. p. 773.* ita nec hae (replicae) ab eo, quod super exceptione liquida pronuntiatur. Actor replicando fit reus, *l. 2. §. 2. de except.* Non ergo ipsi reus invidebit ius, quod, qua exceptionem, ipse habet; Reus ad probandam exceptionem, in processu executivo ob defectum probationis liquidae reiectam, remittitur ad iudicium ordinarium. Quidni igitur etiam actor, replicam, propter exceptionem, in continenti liquidam, minus attentam, probaturus, admittetur?

XXXVI.

(1) Ratio du-
bitandi ob au-
toritatem rei
iudicatae.

Sequitur, ut, quaecumque huic sententiae adversa fronte re-
clamare videntur, carptim breviterque perstringam. Et primum
quidem obiici possit, pronuntiata semel sententia: daß Beklagter
auff die Klage sich einzulassen nicht schuldig/ exceptionem oriri rei iu-
dicatae, qua se reus adversus creditorem, denuo agentem, prae-
munire queat, maxime cum hic sibi ipse imputare debe-
at, quod cautionem in ipso agendi modo non adhibuerit, & il-
lud quidem actionis genus, quod sibi magis commodum esse vi-
deatur, non arripuerit, h. e. replicam libello non statim inseruerit.
Verum enim vero, re probe accurateque, ut par est, ponderata, nul-
lum inde tibi cinem, cui quisquam firmiter innitatur, fabrefieri
posse

Resolvitur.

posse apparet. Namque intelligendum est, quo exceptio rei iudicatae locum obtineat, praerequiri, ut ex eadem denuo agatur causa, ex qua iam antea actum sit, *l. 3. l. 14. pr. l. 27. ff. de except. rei iud.* Iam in praesens actor, cum replicam altioris indaginis, in processu antea instituto exceptioni liquidae oppositam, sed reiectam, in iudicium denuo deducit, non ex eadē, ex qua antea egit, experitur causa. Antea actoris intentio ex fundamento simplici, nullo exceptionis habito respectu, deducta erat in iudicium. Nunc autem ex novo, eoque ad destruendam enervandamque exceptionem compararo, elicitur. Fac enim, heredem ab intestato instituisse hereditatis petitionem, sed, exceptione testamenti aut pactorum dotialium opposita, succubuisse. Quidni vero idem heres ab intestato deinceps de nullitate testamenti, pactorumve dotialium, queri valeat? Ante egit hoc solo fundamento, quod sit ab intestato heres; iam agit, assumpta nova agendi causa, quod testamentum, pactave dotalia, quibus reus possessor se praemunire voluit, nullitatis vitio laborent. Nemo non intelligit, aliam atque aliam subesse agendi causam, atque adeo rem iudicatam in una causa, alteri praeiudicio non existere. Reus quidem per sententiam declaratus est liber, ne respondeat ad actionem, sed ad qualem, quae? Nullam sane aliam, quam quae tum temporis instituta fuit, v. c. simplicem hereditatis petitionem, non ad alteram, puta querelam nullitatis, de qua libellus filet, cuius quidem cancellos ac terminos egredi nequit sententia, & quatenus excedit, pro ipso iure nulla habetur. Neque vero est, quod aliqua acti culpa imputetur, quandoquidem exceptionem, priori in processu sibi oppositam, v. c. testamenti, pactorumve dotialium, praevidere non potuit, cum facta aliena, quorum invincibilis est ignorantia, complectatur.

Causa.

XXXVII.

Alterum dubium inde nascitur, quod reus, opponens exceptionem, sed reprobationem, super ea susceptam, deserens, in ea succumbens, non possit denuo agere, propter autoritatem rei iudicatae, *Carpzov. lib. 2, Resp. 4.* Quo argumento illud confici-

(*) Ratio dubitandi ob argumentum a reo ductum.

Definitio.

ficitur, nec actorem, in replica succumbentem, ad impugnandam exceptionem nova experiri posse actione. At enim vero Carpzovius conceptis verbis loquitur de processu ordinario, quemadmodum vel ex sola eiusdem Responsi inscriptione liquet, atque adeo de eo casu, ubi probatio & reprobatio per sententiam ad uberiores plenioresque actionis, exceptionis, replicæ, & similium, discussionem fuit iniuncta; quo quidem casu non minus actor replicam, quam reus exceptionem penitus amittit, ut nulla alia ratione factam iacturam reparare possint, cum ipsis omnino obstat rei iudicatæ auctoritas, siue fatalia deseruerint, siue in ipsis causæ meritis succubuerint. Secus autem res habet eo casu, cum actor via experitur executiva. Tum enim, licet maxime reus vel terminum ad probandas in continenti exceptiones præterlabi pateretur, vel in probandi modo secundum indolem processus instituti deficeret; nihilo tamen secius ipsi suppeteret copia atque potestas exceptiones in iudicium ordinarium reconventionis deducendi, quandoquidem probationis defectus, vel desertio, opponendi quidem modum, non tamen ius ipsum, alia ratione urgendum, excludit; Atque de desertione quidem probationis locus est apud Berlichium *Part. 2. Dec. 271.* quem commemorat Dn. Svendendorfferus *Process. Fibig. p. 773.* Neque vero est, quod quisquam Carpzovium Berlichio hoc loco opponat. Namque Carpzovius, quemadmodum præcepi, intuetur processum ordinarium; Contra vero Berlichius executivum, in quo reo ratione exceptionum turbidarum reservatur reconventio. Neque Berlichius consultus de succumbentia rei circa probandam exceptionem in processu executivo aliud respondisset, quam ipse paulo ante de desertione probationis conceptis verbis responderat. Neque eundem secus de utroque casu, quem Carpzovius tractat in processu ordinario, censuisse probabile est; Quemadmodum nulla apparet dubitandi ratio, Carpzovium quoque, de casu, a Berlichio intento, rogatum, in eandem sententiam fuisse concessurum, ut non sciam satis, num Dn. Svendendorfferus, *pag. seq. 774* Carpzovii sententiam de eodem processu, quem Berlichius intuetur, atque ad eo executivo intelligat,

Carpzovius
Berlichio con-
ciliatus.

ligat, quod quidem legenti ex formula oppositionis ibidem factae
fortasse persuasum esse possit. Quanquam, quod attinet ad Ber-
lichium, is paulo obscurior, & circa finem de remedio ex L. Dis-
famari fluctuare videtur.

XXXVIII.

Quibus quidem ita constitutis, non est, quod Carpzovii do-
ctrinam aliquis nobis obiiciat, atque inde contra actorem, repli-
cam seorsim per modum actionis deducturum, argumentum ar-
cessat. Facenim, actorem antea iudicio egisse ordinario; tamen
eo usque deventum non est, quod praerequirat Carpzovius, ut
probatio & reprobatio per sententiam, ad uberiorem discussionem
meritorum causae, fuerint iunctae, quin potius nos prae oculis
illum habemus casum, ubi reus opponendo exceptionem, eamque
in continenti probando obtinuit, quo minus, reiecta quippe acto-
ris in altiore consistente indagine replica, ad actionem proposi-
tam respondere teneatur; qua quidem parte processus institutus
ordinarius, vi exceptionis, in continenti liquidae, a reo opposi-
tae, quodammodo degenerasse in executivum videtur; quando-
quidem reus excipiendo vice actoris est, *l. 19. ff. de prob.* Quem-
admodum itaque reo non nocet defectus, desertiove, probatio-
nis in processu executivo, quo minus exceptiones deinceps in or-
dinarium deducere iudicium queat: ita nec actori, mutato tan-
tis per exceptionem, a reo oppositam, in continenti liquidabi-
lem, processu, defectus probationis eiusdem generis impedimen-
to est, quo minus replicam altioris indaginis, cuius ratione loco
rei excipientisque habetur, novo iudicio ordinariae probandam
suscipiat. Amplius reus, cum in processu executivo deseruit pro-
bationem, in eave succubuit, intelligendus est deseruisse proba-
tionem, in eave defecisse, non omni omnino, sed ea saltem, quae
pro ratione processus executivi requirebatur, h. e. in continenti
liquida. Pariter comparatum est cum actore: Hic enim, cum
contra exceptionem, in continenti liquidam, non valet eodem
modo probare replicam, intelligendus est, defecisse in probatione
replicae, non omnifane, sed ea solum, quae pro indole processus,

ad removendam exceptionem, in continenti liquidam, desiderabatur, salva ceteroqui probatione ordinaria, seorsim suscipienda. Neque vero sententia, utur indefinite concepta: daß Beklagter auf die Klage sich einzulassen nicht schuldig/de alio actionis genere, quam quod fuit institutum, non de omni omnino, & ex quacunque causa proveniente, est intelligenda.

XXXIX.

Post iuratum documenti liquidi diffissionem locus est iudicio ordinario.

Quia recognitio per testes tum non conceditur.

Quare etiam, cum vel reus, executive conventus, documentum actoris, vel actor documentum, a reo ad impediendum litis ingressum productum, iurato diffitetur, neuter est prohibendus, quo minus damnum sic acceptum ordinario reparet iudicio, atque adeo actor, reusve, deinceps per testes veritatem documenti comprobet. Namque quemadmodum in processu executivo, sive quot. escunque documentum in vim processus executivi, atque adeo vel ad condemnandum in continenti reum, vel eundem ab instituta actione eodem modo præmuniendum, producitur, ad declinandam iuratum illius diffissionem, recognitio per testes locum non invenit, Dn. Svendendorff. *Process. Fibig. p. 719.* ita rationis est, ei, qui hoc processus genere succubuit, liberum relinqui, utrum remedio illo ordinario uti velit, ad impugnandam iuratum diffissionem modo factam, utpote quæ loco iuramenti, non a parte, sed ab ipsa lege, delati, habetur, atq; adeo contraria deinceps probatione destrui ac infirmari potest, *arg. l. 31. ff. de iureiurand.* Neque vero, quicquid post iuratum documenti guarentigionati diffissionem a iudice decretum, pronunciatumve est, aliter, quam pro natura & indole instituti processus, intelligi potest, salvo ceteroquin integroque iudicio ordinario.

XL.

Quemadmodum reus in probatione pro exoneranda conscientia articulos super exceptionibus concipere.

Quodsi reus, ut evitet iusiurandum, sibi super libello actionis delatum, conscientiam probationibus defendere velit, debet articulos super ipso actionis fundamento, atque adeo libello contentis, & a se in litis contestatione negatis, capitibus, concipere; neutiquam vero super exceptionibus, a se litis contestationi eventualiter, ut vulgo loquuntur, annexis. Est enim probatio pro exoneranda

oneranda conscientia nihil aliud, quam quoddam delati iurisiurandi surrogatum. Super quibus itaque capitibus, quave forma delatum est iuramentum, super iisdem etiam, eademve forma, expectandum esse istud probationis genus, iuris ratio dicitur. Et quis non videt, reum manifesto vitio probationem exceptionum confundere cum probatione pro exoneranda conscientia? Haec eo saltem collineat, ut reus factam negatae litis contestationem, v. c. *se centum mutuo non accepisse, se non iniuriasse*, sustineat & tueatur, atque adeo minus vera esse, quae ab actore in libello fundamenti loco sunt proposita, evincat; Illa vero comparata est ad exceptiones probandas, v. c. *se soluisse, factum libellatum esse verum*. Nec est, quod reus de aliqua sibi hoc loco facta iniuria queratur. Eccur enim litem non contestatur affirmative, quo casu non minus probatione pro exoneranda conscientia, quam praestatione ipsius sibi delati iuramenti, facile superfedere, & operam studiumque suum probandis ocus exceptionibus impendere poterit? Accedit, quod & relatio iuramenti, adiuncta qualitate & circumstantia, ex qua resultat exceptio peremptoria, non admittatur, ut ex Hilligero ad Donellum 24. *Comment. 21. lit. R.* recte monuit Dn. Svendendorfferus *Proceff. Fibig. p. 1355.* conf. Ant. Faber *in Codice lib. 4. tit. 1. def. 19.* Confitequens igitur est, ut nec probationi pro exoneranda conscientia super eiusmodi circumstantia, indeque proveniente exceptione, locus, relinquatur.

re nequit;
(1) quia est
surrogatum
iuramenti de-
lati.

(2) quia rela-
tio iurisiuran-
di, adiuncta
certa qualita-
te non valet.

XLI.

Quibus ira praestructis, illud valide infertur, nec actori permittendum esse, ut ad iuramentum, sibi a reo super exceptionibus oppositis delatum, declinandum, articulis probatoriis pro exoneranda conscientia replica fundamenta immisceat. Neque enim hoc quoque loco aliae actoris, aliae rei, constituti possunt partes, quum sane, quidquid de reo est dictum, idem omne ad actorem replicantem optime quadret. Confiteatur igitur modo actor exceptionem a reo oppositam, & hoc modo se ab onere iurandi, defendendique conscientiam probationibus, immunem liberumque


Ita nec actor
in eiusmodi
probatione
articulos elisi-
vos super re-
plica formare
potest.

praestet, ac eo potius se convertat, quo replicam, ad convelledam exceptionem obiectam, articulis complecti elisivos, probatamque dare valeat. Quod quidem ipsum eo pertinet, ut intel- ligamus, in probatione pro exoneranda conscientia neque ex a- ctoris, neque ex rei parte admitti articulos elisivos, sed eos omni-

Quibus tamen conceptis, iuramenti deferri poena non habet locum.

no pro impertinentibus haberi. Quamvis existimem, actorem, reumve, qui in probatione pro exoneranda conscientia eiusmodi, aliisve impertinentibus, articulis est usus, propterea non statim deserti iuramenti poenam incurrere, utpote quae *Ordinat. Proc. tit. 19. §. Wenn nun. vers.* da aber/ eo solum casu, ubi alteruter li- tigantium susceptam pro exoneranda conscientia probationem deseruit, statuta legitur, atque adeo ad alios casus, imo ne qui- dem ad eum, cum quis probationi iam susceptae renunciavit, Dn. Svendendorff. *Process. Fsig. p. 1548.* temere est proroganda. Sa- ne regressus ad iuramenti delati praestationem loco antea comme- morato toties permittitur, quoties non probatum est, quod ad evitandum iuramentum probari debebat. Iam conceptis articu-

lis, ex quacunque causa impertinentibus, quis nega- verit, nihil etiam esse probatum?



Florentissimo Iuveni

IOH. HENRICO EXSIO,

S. P. D.

P R A E S E S.

NOlo deesse virtuti Tuae, diligentiamque, quae plurimum peraptum ad omnia ingenium adiuvit, vere laudo, propterea quod me ducem studii tui delegisti, mihi que potissimum, publice privatimque ius tradenti, morem, laudis plenum, approbasti. Nec vero materiam colaudandi altius repeto, sed conquiesco in praesenti specimine, quod animis omnium oculisque subiicis, atq; adeo confirmas doctrinae nostrae existimatoribus, tanto longius te abfuisse ab inertia, quanto maiori industria ad argumentum propositum incubueris. Quam collatam bene operam quum comprobem, etsi
non

non sum ignarus, plura eiusdem rei telimaturum, quum tempus ususque rei forensis limaverit magis iudicium ac subegerit: tamen in praesenti mihi probatur animus, qui eo iam nititur, quo aliquando enitetur. Quare vehementer Tibi gratulor, auctorque sum ac suasor, urgeas propositum plenusque spei contendas ad honores, quos fori prudentia tibi & pollicetur, & deferet cummulatos. Vale.

